



# **PRIMEIRU MINISTRU**

## **DISKURSU HUSI**

**S. EXA. O PRIMEIRU-MINISTRU**

**TAUR MATAN RUAK**

**IHA APREZENTASAUN PROGRAMA  
VIII GOVERNUN KONSTITUSIONÁL**

Parlamentu Nasionál, lora 25 fulan-jullu tinan 2018

Sua Exelénsia,

Señór Prezidente Parlamentu Nasionál

Sua Exelénsia,

Vise-Prezidente Parlamentu Nasionál sira

Sua Exelénsia,

Señora no Señór Deputadu sira

Karu Kolega,

Señora no Señór membru Governu sira

Señora no Señór sira

Distintu Konvidadu sira

Ho onra boot no haraik-an tebes mak ami apresenta ba Parlamentu Nasionál no ba País tomak, programa ne'ebé sei define liña orientadora boot sira ba knaar ne'ebé Governu Konstitusionál VIII sei hala'o iha tinan lima oinmai.

Ami halo apresentasaun ida-ne'e iha momentu ne'ebé atu decide ita hotu nia futuru, atu transforma Timor-Leste ba país ida ne'ebé "*seguru, ho populasaun ida ne'ebé saudavel, matenek no dezentolvidu liután*".

Ami kumpri ona formalidade konstitusionál ida-ne'e, iha tempu ne'ebé iha mudansa istórica, iha ne'ebé ita asume fila fali ita-nia vizaun ne'ebé firme ba Povu atu transforma Timor-Leste, "país ida ne'ebé *to'o agora sei ho rendimentu ki'ik, ba sosiedade ida ne'ebé dezentolvidu liután ho rendimentu médiu-aas*."

Ita halo kompromisu sira-ne'e iha tempu Paz no Esperansa nian ida, iha ne'ebé ema barak rekoñese balansu pozitivu ne'ebé Timoroan sira no País ne'e hetan ona iha ninia progresu, hahú kedas iha independénsia, iha dalan ba dezentolvimentu no ba modernidade ida ne'ebé sa'e ba beibeik no ho baze ne'ebé metin.

Iha tinan 2014, ita konsege rezolve ona, problema dezlokadu internu no refujiadu sira nian, hodi garante seguransa no estabilidade ekonómika no sosiál, ne'ebé permite dezentolvimentu armoniozu ba ema, família no ba organizasaun sira seluk husi sosiedade sivíl nian.

Hahú kedas iha tinan 2011, mak ita iha ona, Planu Estratéjiku Dezentolvimentu Nasionál, ne'ebé decide hamutuk ho setór oin-oin husi ita-nia sosiedade, tanba tuir kompromisu ne'ebé halo ona ho parseiru internasionál sira, liuliu ba indikadór no meta sira ne'ebé define ona husi Roteiru ba Implementasaun Objetivu sira Dezentolvimentu Sustentavel nian.

Ita bele hametin ona ita-nia asaun governativa, hodi harii aliserse ba administrasaun públika ida ne'ebé modernu, di'ak no bele fó servisu oin-oin ne'ebé povu husu.

Ita iha susesu iha negosiasaun internasionál sira, atu hakbiit ita-nia soberania iha ketan-tasik (fronteira marítima) ka ketan-raik (fronteira terrestre) sira, ho vitória ne'ebé daudaun ne'e ita hetan iha negosiasaun Ketan-Tasik ho Austrália, ne'ebé fó-dalan mai ita atu hasoru ho laran-metin iha objetivu nasional boot ne'ebé atu lori benefísiu sira husi explorasaun **Greater Sunrise** nian iha tempu oinmai ba Tasi-Mane Timór nian.

Iha tempu hanesan, no ho ita-nia laran ksolok, ita haree ona melloria ba padraun no kondisaun moris Timoroan sira nian ida ne'ebé progresivu no kontinuadu.

Ami ko'alia hanesan ne'e tanba saláriu mínimu aumenta ona husi USD 85.00 ba USD 115.00, tanba ita bele kria ona, iha 2015, empregu foun hamutuk 63.000 liu, tanba konsumu privadu aumenta ona, iha tinan 2015, ba dólar millaun 900 (aumentu ne'ebé besik 160%, husi tinan 2004 to'o tinan 2014) ka tanba esperansa moris Timoroan sira nian aumenta ona ba tinan 66.2, iha 2007, ba tinan 69.8 ne'ebé rejista iha tinan 2017, buat ne'ebé hatudu loloos melloria iha indikadór sira saúde nian, aihán ka abitasaun ba família sira no iha asesu ba servisu públiku sira eletrisidade, bee, saneamentu no ambiente.

Ita konsege hamenus diferensa entre ema riku no ema kiak, iha tinan 2014, ba 10,4%, ita konsege hasa'e demokratizasaun kona-ba servisu telekomunikasaun sira ka internet, no ita rejista ona rezultadu sira di'ak liu, bainhira ita kompara ho nasaun sira seluk, ezemplu, ita-nia nasaun maluk Áfrikaoan sira husi CPLP no G7+.

Ita mós hatene katak ita halo ona progresu importante sira iha esforsu nasional boot ba **hamenus kiak**, ezemplu, se ita uza "*indikadór intenasional ho dólar amerikanu 1,9 ba loron ida, ita haree katak número kiak nian tun maka'as iha Timor-Leste, husi 47%, iha tinan 2007, ba 30%, iha 2014*".

Buat hirak-ne'e hotu lori ita ba hasoru futuro, ho konfiansa ne'ebé boot liután, tanba karik iha tinan sanulu ikus ne'e, ho taxa média kreximentu nian liu husi 7,3%, ita konsege hamenus ona número kiak ba persentajen hamutuk 16, iha duni razaun atu fiar katak, karik ita hatene mantein índise kreximentu atual liu 2,37%, ita sei bele hamenus liu tan número ema no família sira ne'ebé sei afetadu husi flajelu ka kastigu sosiál ba 10%.

Sua Exelénsia, Señor Prezidente Parlamentu Nasionál

Distintu Deputadu sira

Maski Estadu Nasaun nian bele fó garantia no pozitivu, satisfasaun número no indikadór hirak-ne'e nian labele, nein hasees-an husi realidade ne'ebé hatudu preokupasaun, dezafiu no difikuldade barak, ne'ebé mak ita sei hasoru iha ita-nia sosiedade.

Ezemplu, ita ko'alia ona kona-ba hamenus kiak ka aumentu rendimentu sira, maibé importante atu hanoin hikak katak "*ema besik 42% laiha possibilidade atu sustenta sira-nia an*".

Tanba ne'e, ami haree evolusaun **Má Nutrisaun** nian, ho preokupasaun, kauza husi falta fonte subsisténsia seguru, ne'ebé sei influensia hela kreximentu labarik sira nian hamutuk 46% to'o tinan 5.

Falta rendimentu regulár iha família sira, impede labarik Timoroan sira atubele atinje as (altura) no todan (pezu) ne'ebé rekomena ba sira-nia kreximentu fíziku no psikolójiku di'ak, nune'e kompromete sira-nia dezentvolvimentu intelektuál no profisionál iha tempu oinmai.

Dadus sira-ne'e haforsa husi ajénsia internasionál sira ka husi ita-nia Ministériu Agrikultura, ne'ebé hatudu mai ita katak “36% husi ita-nia populasaun moris iha situaun risku ba **inseguransa alimentár**”, ho número ne'ebé boot iha Munisípiu Oekusi, Manufahi no Ermera.

Tanba ne'e, ita presiza define prioridade foun, ba utilizaun ida ne'ebé didi'ak, ho kritéria no sosialmente responsavel ba rekursu no meiu ne'ebé iha.

Ita presiza utilizaun ne'ebé sensível liu ba kestaun sira kona-ba karénsia ekonomia nian no vulnerabilidade, husi Fundu Mina-rai nian, maski comunidade Internasionál hahii tebtebes, ne'ebé tau ita iha fatin dahuluk iha Ázia no datoluk iha Mundu, iha ninia jestaun di'ak.

Ita bele hetan ona susesu iha ninia rentabilizasaun, husi millaun 371, iha tinan 2005, ba biliaun 16,07, ne'ebé akumula iha tinan 2017, maibé ita labele kontente demais ho rezultadu ne'ebé hetan ona, karik sei iha tan dezigualdade sosiál barak, ho Timoroan rihun ne'ebé seidak bele hetan kondisaun mínima ba moris di'ak materiál no espirituál nian, ne'ebé promete ona husi governu sira no husi ita-nia Konstituisaun.

Sua Exelénsia, Señor Presidente Parlamentu Nasionál

Distintu Deputadu sira

Hanesan ha'u hatete ona iha ha'u-nia tomada pose, ita maka **Governu ne'ebé ho Esperansa**.

Ita hatene katak dezafiu sira ne'e réal (loos), sériu no balu labele rezolve ho fásil iha tempu badak; maibé

Ita la lakon konfiansa, la ta'uk, tanba ita fiar iha unidade objetivu sira, no iha kbiit atu hala'o ita-nia programa, hodi halibur setór sira husi sosiedade nian.

Ita hanesan Nasaun ida Joven no Grandioza, maibé ita-nia Klamár no ita-nia Identidade ninia forsa la'ós buat ida ne'ebé fó de'it mai ita: *tenke buka atu hetan husi jersaun ba jersaun*.

To'o ona tempu atu afirma fila fali espíritu rezisténsia nian ba ita-nia kombatente libertasaun nasional sira, hodi banati tuir ezemplu sira ne'ebé di'ak liu, hodi hases an husi hahalok ne'ebé ladún di'ak, buka halo serbisu ne'ebé di'ak liu no servisu.

Ita labele husik ita-nia sidadaun sira hatoman an hodi halimar de'it no la halo serbisu, no ita mós labele husik sira baruk atu buka riku, título (naran), kargu ka pozisaun, tanba la fó benefisiu ba ema hirak ne'ebé presiza liu, la hetan tulun ka sira ne'ebé ema haluha.

Maibé ita presiza ema sira ne'ebé mak hatene no fó valor ba moris husi nia kosar-been rasik, ho hakarak rasik, tulun malu, iha dixiplina, iha sakrifísiu no hamutuk hodi servisu ba knaar boot sira ka ba objetivu instituisaun sira nian.



Ita deve ida-ne'e husi ita-nia beiala, Eroi no Martir sira, Mane no Feto, Antigu Kombatente, Faluk no Oankiak sira, ne'ebé luta no sakrifika sira an, atu nune'e ita bele hetan moris ida di'ak liu.

Sira haree Timor-Leste importante liu fali sira-nia hakarak rasik, liu fali sira moris fatin ka sira-nia kondisaun sosiál ne'ebé maka la hanesan.

Ida-ne'e maka dalan ne'ebé ita hakarak mobiliza fila fali Nasaun ne'e!

Ita-nia sidadaun sira mós matenek ka badinas hanesan ho ita-nia viziñu sira. Ita-nia hanoin mós inovadór, kriativa ka badaen hanesan ho ita-nia kompetidór sira. Ita-nia produutu sira iha kualidade, no barak maka bele sertifika hanesan orgániku no belun ba ambiente nian, iha merkadu konsumu nian ne'ebé ezijente liután.

La'ós katak ita laiha kapasidade, maibé interese maka laiha, baruk, lakohi buka atu hatene, laiha oportunidade, priviléjiu (benefísiu), despesismu no dependénsia ne'ebé maka'as liu no gastu sira ne'ebé la tuir nia dalan ka la presiza!

Ita iha knaar ne'ebé di'ak tebes atu moderniza Timor-Leste, hodi tuir ezemplu internasionál ne'ebé di'ak liu husi despeza no desizaun ne'ebé tuir kritéria no husi kombat ba korrupsaun.

Iha fatin hotu, iha serbisu atu halo, ba ema ne'ebé hakarak atu sai útil no produtivu. Ita-nia ekonomia iha biban barak, maibé tenke aten-brani no badinas.

Tanba ne'e mak ita implementa **prinsípiu boot haat** ne'ebé lori asaun governativa no kolabora atu implementa liña orientadora sira, ba programa Governu nian ne'ebé ita debate ohin:

1. Dahuluk, prinsípiu kona-ba **Unidade** – promove *Espíritu Pertensa (Sente Ninian mos)* nian hamutuk ho membru Governu no bankada parlamentár sira ne'ebé tulun prinsípiu ne'e, hodi bele alkansa objetivu, tarefa, medida sira ne'ebé atu adota no orientasaun ne'ebé atu kumpri. Ba ida-ne'e, ita hotu tenke kontribui atu hala'o vizaun Governu nian, hodi kumpri ninia misaun no objetivu sira. Responsabilidade ne'e la'ós de'it ba Titulár sira ne'ebé kaer pasta, maibé ba estrutura hotu, tanba husi loron ba loron asuntu sira sai transversál no interdependente liután.
2. Daruak, prinsípiu kona-ba **Objetividade** – promove jestaun ida ne'ebé halo tuir kritériu no tetu-didi'ak kona-ba rekursu sira País ne'e nian, ho orientasaun ba objetivu no meta sira ne'ebé atu alkansa, maibé la haluha fundamentu prinsipál Governasaun nian, ida ne'ebé tuir ita-nia hanoin, ba interese públiku nian, tenke fó "Moris-di'ak isin no klamar nian ba sidadaun sira", tuir ida ne'ebé hatuur ona iha Artigu da-6. alínea e) Konstituisaun RDTL nian;
3. Datoluk, prinsípiu kona-ba **Koordenasaun** – promove esforsu ba komunikaun, integrasaun no rentabilizasaun (fó rendimentu ne'ebé di'ak) ba meu sira, la'ós de'it iha setór idak-idak nia laran, maibé ho mós órgaun no organizmu sira seluk, iha espíritu "Governu Úniku" ida ne'ebé loloos.

4. Dahaat, prinsípiu kona-ba **Ekonomia Meiu sira nian** [uza meiu sira tuir nesesidade] – promove poupanza no sees husi gastu hirak ne'ebé la tuir nia dalan ka la presiza. Meiu sira ne'ebé mak iha, limitadu tebes no la to'o, labele hatán ba prioridade hotu-hotu iha tempu ne'ebé hanesan. Ita tenke hatene tuir, bainhira de'it, kona-ba realidade ida-ne'e, liuliu iha momentu halo programa ka hala'o gastu sira, atu nune'e bele tuir nasaun ninia rendimentu no reseita sira.

Ho liafuan badak, **Ukun ida ne'ebé haree ba Rezultadu**, ne'ebé sai mata-dalan ba servisu sira ne'ebé atu halo ho kualidade, ne'ebé sidadaun sira hein. Governasaun ida ne'ebé labele sai refein ba meiu ka prosesu burokrátiku sira ne'ebé demaziadu liu no ida ne'ebé buka, ho lalais no kuidadu, solusaun sira ba problema hirak ne'ebé sidadaun sira hasoru.

Buat sira ne'e hotu implika jestaun ida ne'ebé di'ak ba rezultadu sira, promesa ne'ebé halo ba Povu no ba kompromisu ne'ebé halo ho Nasaun no parseiru sira dezvoltamentu nian.

Tanba ne'e ami prontu atu simu krítika, opiniaun ka sujestaun konstrutiva sira husi deputadu sira ka sociedade sivil ne'ebé bele hariku no hadi'a dokumentu ne'e maibé labele muda, tanba ami fiar katak Programa ne'ebé ohin ami haruka mai atu hetan apresiasaun, hafoin aprovasaun husi Parlamentu Nasionál, sei transforma ba programa ida ba Timoroan hotu, independentemente ka livre husi ninia konvikasaun polítiku-partidáriu rasik.

Sua Exelénsia, Señor Prezidente Parlamentu Nasnionál

Distintu Deputadu sira,

Ohin ita hahú debate kona-ba Programa Governu nian, ba misaun difísil no ezijente atu jere destinu país nian, husi **área prioritária 5** ne'ebé konsidera importante tebtebes ba futuru nasaun nian:

- **Kapital Sosiál** – Timor-Leste nia rikusoin loloos, kompostu husi sidadaun lubun ne'ebé barak maka foin-sa'e, maibé konta mós ho partisipasaun no inkluzau emá hotu nian: fetu no mane, labarik, emá otas boot (adultu), ferik no katuas, faluk no oan-ki'ak, veteranu no antigu kombattente, sidadaun sira ne'ebé laiha kapasidade, traballadór, emprededór, emprezáriu no investidór sira, *“maibé la husik emá ida ba kotuk”*.

Kapital Sosiál ida ne'ebé la besik de'it ba Timoroan millaun ida no rihun atus rua ne'ebé hela iha país ne'e, maibé mós ba sira ne'ebé Hela Iha Rai-li'ur, [Comunidades Residentes no Exterior], ho nune'e aumenta potenciál interkámniu nian iha kontinente lima.

Ita hakarak kapital sosiál ida ne'ebé matenek, kapasitadu, kompetente, kualifikadu, saudavel, no ida ne'ebé fasilita pakote ida ba medida sira moris di'ak nian atu hasa'e ninia potenciál.

- **Infraestrutura sira** – Sai hanesan pilár sentrál ida ba ita-nia planu dezvoltamentu estratéjiku, tanba importante tebes ba dezvoltamentu ekonómiku no sosiál, liuliu atu tulun atividade

produtiva sira, hodi kontribui ba kriaun empregu, diversifikasaun ekonomia no ba dezvoltimentu setór privadu nian.

Sai hanesan mós dezafiu orsamentál boot liu ida, ne'ebé konsome rekursu finaseiru boot liu, (liuliu ba projetu boot sira) ne'ebé ezije rigór maka'as iha planeamentu, monitorizasaun, inspesaun, fiskalizasaun no avaliasaun ba projetu sira, atu garante ninia konkretizasaun ne'ebé efikás, eficiente, ho kualidade nune'e mós ba ninia utilizasaun, konservasaun, manutensaun ka relasaun entre kustu no benefísiu multiplikadór sira ba dezvoltimentu.

Labele alkansa objetivu no meta boot sira husi Programa Governu nian kona-ba pobreza, má nutrisaun, autosufisiénsia alimentár, saúde, edukasaun, servisu báziku sira ba bee, sanemanetu, eletrisidade, komunikasaun, transporte, enerjia, setór produtivu sira, dexentralizasaun ka koezaun territoríal (hametin ligasaun entre territóriu sira), maibé laho infraestrutúra husi servisu báziku sira ne'ebé promove no enkoraja dezvoltimentu.

- **Dezvoltimentu Ekonomia nian** – maski ita ne'e país ida ne'ebé iha oportunidade ekonómika no potenciál boot iha dezvoltimentu ba ninia rekursu sira, ita seidak bele hetan rezultadu ne'ebé ita hakarak iha diversifikasaun ekonomia nian, atu haforsa setór privadu, hametin ligasaun entre territóriu sira no hamosu sentru dezvoltimentu oin-oin ne'ebé bele dudu dezvoltimentu la'ó ba oin.

Ita tenke harii no promove ambiente ne'ebé seguru no ho seguransa favoravel atu dada negósiu no investimentu foun iha setór privadu nasional no internasionál. Ba ida-ne'e, ita sei aposta ba indústriia importante tolu: agrikultura (inklui pekuária, floresta no peskas), turizmu no mina-rai, hodi aproveita, liuliu potencialidade natural, jeográfika ka kulturál sira ba ita-nia interese ne'ebé bele hakmaan ita-nia dependénsia husi reseita minarai nian sira.

Tanba ne'e ita tenke iha kreatividade, inovasaun, empededorizmu ka empregu rasik, atu aumenta oportunidade rendimentu nian no hadi'a ita-nia produtividade, kapasidade atu hetan rikusoin no atu kria merkadu/kampu serbsiu foun.

- **Konsolidasaun Governativa** – ita iha objetivu atu kria empregu foun hamutuk 60.000 iha kada tinan, ho previzaun ida bele kria empregu hamutuk 300.000 iha tinan 2021. Ita hakarak hamenus liu 7% ho kontribuisaun ne'ebé boot ba setór privadu no produtivu sira, hodi viabiliza sustentabilidade fiskál.

Ita hakarak mós promove poupansa, ho exedente nesáriu sira ba diversifikasaun setór finaseiru nian no kriaun ba instituisaun bankária, finaseira, ho mikrokréditu, ne'ebé seguru ka uniaun/kooperativa ba kréditu importante sira atu finansia inisiativa privadu, garante empréstimu ka asegura investimentu sira.

Ita sei hadi'a mós jestaun ba finansas públikas atu aumenta no diversifika reseita sira Estadu nian, hadi'a aprovizionamentu, haforsa dexentralizasaun finaseira, orsamentasaun tuir programa sira no promove transparénsia no responsabilidade iha política fiskál, no seluk tan.

- **Governasaun di'ak no Kombate Korrupsaun** – maka kondisaun esensial hirak ne'ebé atu fó servisu no atu implementa política no asaun sira ne'ebé fó-sai iha opsaun boot sira planu no programa Governu nian.

Ita hakarak aumenta konfiansa iha governasaun ne'e, liuhusi mekanizmu sira ne'ebé di'ak liu atu halo avaliasaun ba rezultadu no dezempeñu, hodi promove komunikasaun ida ne'ebé boot liután ho utente sira, kolaborasaun ne'ebé boot liután ho grupu sidadaun no organizasaun sosiedade sivil nian sira no transparénsia ida ne'ebé boot liután iha ezekusaun orsamentál, liuliu iha projetu ho dimensaun boot sira.

Ita sei rigorozu la'ós de'it ho ita-nia an rasik, ho membru Governu no responsável sira administrasaun públika nian, maibé mós ho sira ne'ebé direta ka indiretamente hetan benefísiu husi rekursu sira no subvensaun sira husi Estadu, ka sira ne'ebé utiliza sasán no ekipamentu sira ne'ebé serbisu públiku fasilita (hanesan eletrisidade, bee, transporte, komunikasaun sira, no seluk-seluk tan) hodi promove utilizaun, manutensaun ka konservasaun ne'ebé di'ak, hodi evita gastu hirak ne'ebé maka'as liu, gastu hirak ne'ebé la presiza ka estragu sira ba propriedade públika.

Sua Exelénsia, Señor Presidente Parlamentu Nasionál

Distintu Deputadu sira

Tuir Planu Estratéjiku Dezenvolvimentu Nasionál (PEDN), ita tama iha tinan 2016 iha ezekusaun ba ninia faze daruak nian, ne'ebé sei to'o iha tinan 2020, durante tempu ne'ebé mandatu Governu ida-ne'e nian vigora hela.

Tuir faze dezenvolvimentu nian ida-ne'e, ita tenke fó prioridade ba dezenvolvimentu infraestrutura sira, hadi'a rekursus umanus no aumenta kompetitividade husi ita-nia ekonomia, atu nune'e bele hatuur baze sira ne'ebé sei fó dalan atu iha tinan 2030, ita bele ona halakon moris-kiak, haforsa setór privadu no kooperativu no mós diversifikasaun no modernizasaun ba ita-nia ekonomia.

Tanba ida-ne'e, ita **Kontinua ho Dezenvolvimentu Kapital Sosiál nian**, hodi investe iha asesu ba formasaun profisionál no ba qualidade husi serbisu sira ne'ebé mak ita hala'o iha edukasaun, saúde, inkluziun sosiál, atividade artístika, kulturál, relijiozu no desportiva sira, atu nune'e bele fó ba ita-nia labarik, foin-sa'e, ema otas boot ka katuas, feto no mane sira, planu sira kona-ba moris saudavel, produtivu iha nivel akadémiku ka profisionál, ho hela fatin ne'ebé dignu atubele harii *Família sira ne'ebé Forte no harii Nasaun ida ne'ebé sai Forte liután!*

**Iha Edukasaun no Formasaun**, ita sei fó atensaun liután ba nesesidade atu fó rasik ba estudante ida-idak, livru hirak ne'ebé maka presiza ba sira-nia aprendizajen; fó atensaun liután ba nesesidade espesiál husi grupu sira ne'ebé presiza tulun no mukit liu, bainhira fó apoiu ka bolsa sira; fó atensaun liután ba kestaun sira hanesan saúde eskolár, ne'ebé bele garante, hanesan ezemplu, imunizasaun ne'ebé di'ak ba alunu hotu-hotu no ambiente ida ne'ebé saudavel iha eskola sira.

Ami mós sei kontinua ita-nia luta atu labele hahú tau-naran tarde [ingresso tardio] iha eskola sira (*populasaun 63% de'it mak iha asesu ba edukasaun no formasaun iha tinan 2015*), atu labele husik eskola sedu [abondono precoce] (*taxa husi uma-kain sira ne'ebé pelumenus iha labarik ida maka la eskola tuun maka'as husi 42% iha 2007 ba 17% iha tinan 2014, iha tempu hanesan taxa husi labarik ho tinan 5 ba leten ne'ebé la eskola tuun husi 17% iha tinan 2007 ba 13% iha tinan 2014*), atu kombat absentizmu [falta eskola], atu akonsella ita-nia foin-sa'e sira hodi evita gravidez indezejada sira (isin rua laós ho hakarak rasik), atu halakon violénsia iha eskola fatin sira.

Ita hatene katak taxa ingresu [tau-naran] nian iha Ensinu Pré-Eskolár (*Taxa husi atendimentu pré-primáriu sai di'ak liután husi 3.7% iha tinan 2010 ba 6.7% iha tinan 2015*), iha Ensinu Báziku (*Taxa husi atendimentu iha ensinu primáriu aumenta husi 65,6% iha tinan 2007 ba 91.1% iha tinan 2015*) ka ensinu Sekundáriu nian iha melloria barak, maibé sei iha mós serbisu balu ne'ebé seidauk iha kualidade (*iha biblioteka, laboratóriu, koziña ka kantina merenda eskolár, iha servisu administrativu sira, seguransa, ijiene, meu ambiente, iha enrikesimentu kurikulum, iha akizisaun kompeténsia téknika sira, iha ligasaun ba rede komunikasaun nian sira, iha uma ba profesór sira ka toba-fatin ba alunu dezlokadu sira, seluk-seluk tan*) ne'ebé sei rejista entre área rurál no urbana sira, ka entre eskola sentrál sira no sira-nia eskola filiál sira.

Ba ida-ne'e, ita sei investe maka'as liután iha promosaun espíritu pertensa nian husi comunidade edukativa, hodi promove funksionamentu di'ak, fahe responsabilidade ba malu no kontribuisaun husi asosiasaun profesór, alunu, inan aman sira nian, iha implementasaun dixiplina no jestaun di'ak kona-ba infraestrutura no ekipamentu sira, atu garante utilizasaun, konservasaun no manutensaun ida ne'ebé kumpri ba kritéria sira kona-ba rekursu no meu sira.

Ita mós sei haforsa investimentu iha formasaun di'ak ba profesór sira, liuliu ba formasaun baze nian (*ho atensaun espesiál ba Estabelesimentu formasaun bázika no Faculdade Edukasaun nian*), iha prosesu selesaun no rekrutamentu nian, iha kolokasaun no transferénsia sira tuir kuadru orgániku estabelesimentu ensinu ida-idak nian no ho garantia kona-ba formasaun kontínua (*ho atensaun espesiál ba INFORDEPE no ba oportunidade formasaun nian sira ne'ebé nia orsamentu mai husi Fundu Dezenvolvimentu Kapital Umanu nian* (FDCH, sigla iha lian portugés), ne'ebé garante atualizasaun no adaptasaun kompeténsia sira ba realidade foun edukasaun nian. *Tau ema tuir nia fatin ne'ebé loos, tuir vokasaun dosente ida-idak nian!*

Aleinde investimentu sira seluk ne'ebé projeta ba Sidade Universitária iha Aileu ka Kampus Universitáriu Hera nian ka ba rekuperasaun, rehabilitasaun no konstrusaun infraestrutura foun sira ka ekipamentu eskolár

sira, ita hakarak kontinua hatán ba nesesidade kona-ba kapasidade, abilitasaun, no kompeténsia téknika no profisionál hirak ne'ebé di'ak liu, ne'ebé merkadu traballu, empreza no investidór sira ezije, hodi forma foin-sa'e sira ne'ebé preparadu liután ba Mundu ida-ne'ebé Globalizadu no kompetetivu liután.

Kona-ba ida-ne'e, ita sei kontinua aposta iha transformasaun eskola sekundáriu jerál sira iha ensinu tékniku-vokasionál (ho ambisaun ne'ebé boot liután husi alunu 3.000 ne'ebé prevee iha PEDN) katak garante kapasitasaun no formasaun ba alunu sira, tuir potenciál ekonómiku fatin ida-idak nian no tuir nesesidade dezvoltamentu nian sira ne'ebé rejista iha merkadu traballu nian ka iha empreza sira. Rede eskola sekundária sira nian ida ne'ebé komplementa ho institutu politékniku superiór lima iha área enjeñaria, indústria, petrolífera, servisu sira, turizmu, no otelaria, agrikultura ka akademia peska no estudu tasi nian [estudos marinhos], ne'ebé garante alternativa loloos ida ba ensinu superiór jerál (*populasaun 10% ho asesu ba ensinu superiór, kompara ho 5% iha tinan 2010*), ho probabilidade prokura nian ne'ebé menus iha merkadu traballu.

Iha ensinu rekorrente, ita kontinua aposta iha akizisaun koñesimentu no kompeténsia sira iha moris tomak, hodi ativa filafali programa pós-alfabetizasaun nian, no hodi haburas no habelar sentru aprendizajen komunitária sira, atu nune'e labele iha sidadaun ida maka hela ba kotuk ka ema haluha, hodi garante katak foin-sa'e ka otas boot (adultu) ida-idak iha asesu ba planu moris nian ne'ebé garante ba sira esperansa atu realiza sira-nia mehi, família sira, akadémiku ka profisionál sira.

**Iha Saúde:** Ita hala'o ona progresu hirak ne'ebé signifikativu tebtebes iha indikadór oin-oin ho foku ba: ba mortalidade Inan nian (*ne'ebé tun husi 450 ne'ebé rejista iha tinan 2007 ba 270 iha tinan 2015*); mortalidade labarik nian (*ne'ebé tun husi 60% iha tinan 2007 ba 45% iha 2015*); imunizasaun to'o ba otas tinan 1 (*mellora husi 63% iha tinan 2007 ba 74% iha tinan 2015*); atendimentu ba kazu sira durante partu, husi profisionál saúde nian (*mellora husi 19% iha tinan 2007 ba 57,7% iha tinan 2015*); insidénsia malária nian (tuun husi *20,6% iha tinan 2007 ba 2,7% iha tinan 2015*) ka detesaun ba tuberkulozu (*mellora ba 90%*).

Ita kompleta tan promesa sira ne'ebé prevee iha PEDN, ho kolokasaun médiku, parteira no enfermeira sira iha suku ka postu saúde ida-idak, ka ho estabesimentu ospital referénsia nian hamutuk 4: iha Oekusi, Maliana, Maubisi no Baukau.

Maibé, sei iha tan serbisu barak mak atu halo hodi implementa tomak Planu Estratéjiku Saúde Nasionál liuliu atu hadi'a nivel qualidade nian no satisfasaun utente nian, iha servisu sira hanesan: atendimentu, tula moras, asesu no aprovizionamentu ba ai-moruk, meu komplementár atu halo diagnóstiku, rejistu, arkivu no dijitalizasaun prosesu sira, komunikasaun no ligasaun entre servisu lokál, sentrál no rejional sira ne'ebé aproveita liña tranzmisaun EDTL nian no fibra ótika ne'ebé sei liga ba organizmu Estadu nian sira.

Ita sei hadi'a prestasaun kuidadu saúde nian iha país laran tomak, ho atensaun espesial ba área remota sira no ba grupu sira ne'ebé maka prezisa liu tulun, mukit no ne'ebé la hetan tulun, hodi nune'e bele kontribui ba prinsípiu sira hanesan inkluzo, ekuidade, efisiénsia no qualidade ne'ebé sai matadalan ba Governu.

Ita hakarak hadi'a sistema finansiamentu nian no jestaun rekursu nian sira, kontinua ho esforsu atu halo desentralizasaun servisu sira, hadi'a koordenasau intersetoriál, haree filafali no hadi'a estrutura sistema nasionál saúde nian, asegura funksionamentu ida ne'ebé di'ak husi Serbisu Autónomu Ekipamentu Saúde nian (SAMES-sigla iha lian portugés), asegura sebisu emerjénsia nian sira ne'ebé di'ak liu no estabese parseria ho setór privadu ka organizasaun sira ne'ebé maka la'ós governamentál, hodi alkansa "*Timor-Leste ida ne'ebé saudavel liután*"

Ita hakarak halo sai di'ak liután rekursu materiál no rekursu umanu sira, hodi tau matan liu ba iha formasaun, kapasitasaun no avaliasaun kona-ba dezempeñu, hodi hadi'a kondisaun ijiene no aseptizasaun edifísiu hoto-hotu ne'ebé uza ba hala'o kuidadu saúde nian.

Ita sei intensifika ita-nia parseria sira kooperasaun nian, atu nune'e garante diversifikasaun progresivamente olístika, husi kuidadu iha territóriu nasionál, haree liu ba servisu onkolojia nian, emodiálize no diagnóstiku komplementár sira ba Ospítal Nasionál Guidu Valadares ida ne'ebé iha "*kualidade Mundiál*" hanesan refere iha ita-nia planu estratéjiku (PEDN).

Ita hakarak hamenus nesesidade atu haruka moras sira ba rai-li'ur, maibé garante mós partisipasaun ida ne'ebé boot liután husi setór privadu, hodi enkoraja kria unidade no ospítal privadu sira, ne'ebé kompleta no aumenta hirak ne'ebé mak Estadu oferese.

Ita laran-metin atu fasilita ambiente negósiu nian ida ne'ebé favoravel atubele hamosu indústriia iha setór ai-moruk no saúde nian no atu hasa'e kualidade formasaun husi UNTL ka estájiu sira iha Ospítal, atu nune'e bele dada estudante, formandu no profisionál sira husi zona Ázia-Pasífiku nian ba estuda, hanorin ka serbisu iha Timor-Leste.

**Iha Inkluzau Sosiál nian:** Tinan-tinan ita atribui millaun 120 iha asisténsia sosiál, haree liu ba sidadaun sira ne'ebé maka presiza liu tulun, mukit no sira ne'ebé la hetan tulun, hodi fó apoiu ba veteranu sira hamutuk 27,651 ho pensaun fulan-fulan; família hamutuk 51,759 ho subsídiu sira kondisionál Bolsa Inan nian (Bolsa da Mãe); no família hamutuk 94,723 ho subsídiu ba ferik-katuas sira no sidadaun inkapasitadu (la iha kbiit) sira.

Ita mós fó apoiu ba vítima sira husi abandonu [ema husik hela], negligénsia [ema la tau matan], violénsia, abuzu, krime (*insestu, seksuál*) [halo relasaun ka aktu seksual entre família ne'ebé iha relasaun parentesku besik liu malu] ka sira ne'ebé sofre tanba dezastre naturál sira, liuhusi programa apoiu nian sira iha abitasaun sosiál, atribuisaun sasán sira ne'ebé sai hanesan nesesidade dahuluk, ai-han ka hela-fatin (temporáriu no permanente sira) no materiál konstrusaun nian sira.

Ita sei kontinua investe polítika ida-ne'e ne'ebé hakarak "*ba uluk sira ne'ebé iha hela ba kotuk*" no ne'ebé iha risku boot atu hetan moris-kiak, nutrisaun ladi'ak, marjinalidade ka delinkuénsia [hahalok sira ne'ebé kontra lei], liuhusi instrumentu hirak ne'ebé fó filafali sira-nia dignidade no kontribui hodi hasai sira husi estadu frajilidade nian ne'ebé sira hasoru.

Kontinua hadi'a rede seguransa sosiál nian sira, ho sinalizasaun, prosesamentu no referénsia ba kazu sira ne'ebé grave liu, ba apoiu ne'ebé lais, ladún burokrátiku no efikás. Haree filafali orgánika husi servisu asisténsia sosiál no mapa pesoál nian ne'ebé iha relasaun, kria kondisaun hirak ne'ebé di'ak liu ba ligasaun servisu no koordenasaun ho entidade esterna sira (*liuliu iha partisipasaun krimínál nian*), haforsa liña referénsia no emergjénsia nian, haluan rede apoiu sira ho koordenasaun sentru solidariedade sosiál nian ne'ebé iha tiha ona no haluan neineik maibé beibeik apoiu sira husi rejime kontributivu sira seguransa sosiál nian, hodi garante sustentabilidade iha futuru.

Ita mós tenke aposta liután iha movimentu asosiativu no iha parseria sira ho instituisaun solidariedade sosiál nian sira, ne'ebé bele halo servisu sira ne'ebé iha valór boot iha área hirak ne'ebé disponibilidade Estadu nian menus. Servisu sira iha kuidadu saúde paliativu nian no servisu apoiu nian sira ba ema sira ne'ebé laiha kbiit (inkapasitadu) ka sira ne'ebé maka sofre moras bele halo sira sai inkapasitadu, iha uma de'it; iha serbisu rehabilitasaun fizika, psíkika ka motora nian sira; iha hela-fatin ba idozu no sentru loron komunitáriu sira nian, ba akollimentu no interligasaun iha formasaun labarik sira, foin-sa'e no adultu sira; iha transporte moras nian ka iha protesau ba meu ambiente.

Ba Kombatente Libertasaun Nasionál sira, ita hakarak hametin no haforsa knaar Konsellu Veteranu sira nian, hodi garante partisipasaun ne'ebé boot liután no apoiu ne'ebé di'ak liu ba sira-nia inisiativa sira (*asosiasaun, kooperativa, grupu sidadania, negósiu mikro ka médiu sira*) iha sociedade Timoroan nian.

Ita hakarak kontinua implementa política sira kona-ba valorizasaun, rekoñesimentu, prezervasaun no selebrasaun Memória husi Antigu Konbatente Libertasaun Nasionál nian, (semitériu, jardín Erói sira nian no Monumentu sira), hodi halo esforsu atu kompleta rekolla ba Erói no Mártir sira-nia ruin, no rezolve mós iha tempu hanesan kestaun pensaun no tulun osan nian sira ne'ebé pendiente hela.

Ita iha ambisaun atu estabelese tan Fundu Investimentu nian ida, ne'ebé aleinde promove oportunidade sira ba negósiu auto-sustentavel (negósiu ho ninia orsamentu/fundu rasik) , bele asegura sustentabilidade apoiu sosiál nian sira tuirmai.

Ba Feto sira (besik 49,2% husi populasau), ita sei kontinua hatán ba preukupasaun husi ita-nia sidadaun feto sira ne'ebé hakarak sai ativu no partisipativu liután iha prosesu dezvoltamentu ita-nia País nian. Tanba ne'e, ita kontinua aposta iha ninia potenciál, iha implementasaun *Política Nasionál kona-ba Igualdade Jéneru, Planu Asaun (Kontra Violénsia Bazeia ba Jéneru ka kona-ba Feto sira, Pás no Seguransa), kampaña ka programa sira* iha planeamentu ka orsamentasaun ida ne'ebé fó atensaun liután ba kestaun sira jéneru nian, atubele garante igualdade iha direitu no obrigasaun sira iha domínio hotu-hotu husi moris famliár, akadémika (ho estudante feto besik 47% ne'ebé rejista iha tinan 2015, *ho insidénsia komparativu boot liu iha ensinu primáriu no ensinu la formál*), kulturál, sosiál, ekonómika ka política nian (representasaun feto iha Parlamentu Nasionál maka 39%).



**Iha Kultura no Patrimóniu** – Ita kontinua valoriza espresaun artístika oin-oin, hanesan forma pasífika no konstrutivu hodi dezenvolve personalidade, sidadania no karáter sidadaun sira nian, no promove sosiedade ne'ebé voluntáriu, solidária no tolerante liután.

Ita mós sei promove no salvaguarda patrimóniu no eransa kulturál hanesan espresaun identidade nasional nian sira, hodi haforsa ninia valór iha sosiedade no iha ekonomia, liuliu iha dezenvolvimentu Timor-Leste nian hanesan destinu Turístiku, Kulturál no Relijiozu.

Ba ida-ne'e, ita sei promove konstrusaun Muzeu no Sentru Kulturál Dili nian, Biblioteca Nasionál ida, estabelese academia arte, kultura no indútria kriativa nian sira, estabelese sentru kulturál rejional ka munispál sira, promove konstrusaun pavillaun multiuzu sira ka pavillaun sira ne'ebé mak bele uza ba atividade oin-oin (ne'ebé partilla ho atividade desportiva sira), kria kompañia teatru no dansa, no promove interkámniu (troka) kulturál, iha nivel nasional no internasionál nian, liuliu iha eventu sira ne'ebé maka ninia inisiativa maihusi sosiedade sivil.

Ita mós tenke hatene aproveita instrumentu oin-oin ne'ebé iha, ho forma inovadora no kriativa, atu nune'e evita rekursu sistemátiku ba meu sira Estadu nian no duplikasaun sira ne'ebé la presiza.

Eziste opsaun oin-oin, bilateral, multilateral, sidadania individuál no la'ós governmentál sira atu multiplika serbisu sira iha internet, iha lian ofisial, lian nasional sira ka lian serbisu nian sira, iha rede sosial sira no iha Mundu tomak, kona-ba: *ita-nia arzenatu, ourivezaria, Tais, ita-nia hananu no dansa sira, instrumentu muzikal, gastronomia, istória labarik sira nian no ita-nia Istória pasadu gloriozu, ho futuru nabilan ida ne'ebé leno iha orizonte.*

**Iha Juventude nian** – ita hanesan nasaun foun ida iha ne'ebé 50% husi populasauun maka ho otas 20 mai kraik, nune'e ezije oportunidade hirak ne'ebé di'ak liu ba ensinu, formasaun, kapasitasaun no akizisaun koñesimentu ka kompeténsia hirak ne'ebé presiza ba implementasaun moris, ne'ebé ativa ba beibeik, produtiva no partisipativa liután ba dezenvolvimentu individuál ka kolektivu nasaun nian.

Ita labele tan kontinua ho situasaun atuál iha ne'ebé oportunidade serbisu nian la iha, dezempregu buras tebes hodi obriga foin-sa'e sira sai ba rai-li'ur (hanesan ba Irlanda Norte, Austrália, Portugal ka Korea Sul nst.), atu buka kondisaun moris nian ne'ebé di'ak liu.

Ita iha obrigasaun morál no devér atu hatán ba aspirasaun foin-sa'e sira nian, ho mensajen Fiar no Esperansa nian iha futuru, ho lema atu fó ba “*Sidadaun ida-idak Planu Moris nian ida*”, ho orientasaun ne'ebé klaru no akonsellamentu ne'ebé loloos kona-ba oportunidade oin-oin ne'ebé sira konsege, hodi fó apoiu, liuliu, inisiativa sira kona-ba: empriendedorizmu (kapasidade atu loke negósiu), autoempregu (kria serbisu ba an rasik), sentru kriasaun empreza iha universidade sira no kandidatura sira ba fundu ka apoiu iha nivel nasional ka internasionál.

Ita sei enkoraja medida tranzversál kona-ba utilizasaun pavillaun multiuzu iha nivel munispál ka rejional no ne'ebé permite espresaun artístika, relijioza ka desportiva husi foin-sa'e sira, hanesan, liuhusi

Parlamentu Foinsa'e nian, grupu sidadania nian, asosiasaun ka klube sira, hanesan hakerek ona iha *Política Nasionál Juventude nian*.

**Iha Desportu nian** – Ita sei kontinua haree liu ba iniciativa ne'ebé liga ba organizaasaun, asosiasaun, klube ka federasaun, ho responsabilidade espesial iha organizaasaun ka partisipasaun kompetisaun desportiva sira (*nasionál ka internasionál, bilaterál ka multilaterál, ho destake ba kompromisu iha nivel olímpiku, rejionál, ASEAN no CPLP*).

Sei fó atensaun espesial liu ba konsolidasaun, kapasitasaun, formasaun no sustentabilidade husi jestaun ka finansiamentu ba liga amadora ba modalidade oin-oin (hanesan: futeból, basketeból, voleiból, arte marsial sira, nsst).

Ita mós sei promove koordenasaun institusionál, hodi promove iniciativa tranzversál ba utilizaasaun no aproveitamentu rekursu sira (*hanesan ezemplu iha jestaun pavillaun multiuzu sira no infraestrutura desportiva sira-seluk iha nivel munisipál, rejionál ka nasionál*), iha ámbitu desportu komunitária, eskolár, desportu ba saúde ka promosaun atividade artistica, kulturál ka valorizaasaun patrimóniu sira.

**Iha Teknolojia Informasaun no Komunikaasaun nian** – Ita halo ona progresu boot barak iha nivel demokratizaasaun komunikaasaun, liberalizaasaun telefone, asesu ba internet no ba teknolojia foun informasaun nian sira.

Ami mós hakarak atu promove Governu ida ne'ebé modernu, eletróniku no besik liután, simples liu, ladun burokrátiku no sidadaun sira bele iha asesu liuhusi plataforma oin-oin multimédia nian ne'ebé disponivel.

Tanba ne'e, ami sei kontinua haree liu ba ligasaun eletrónika ba servisu públiku sira (*ho baze dados, ne'ebé neneik maibé bebeik sei integrada, koordinada no interligada iha filozofia Governu Úniku ka Filozofia One-Stop-Shop*), hodi aproveita *liña sira tranzmisaun EDTL nian hamutuk 603 km*, ne'ebé sei liga serbisu públiku sira liuhusi fibra óptika.

Ami mós hakarak promove ambiente negósiu nian ida ne'ebé favoravel hodi estabelese empreza foun sira ho produktu hirak ne'ebé disponibiliza liuhusi rede sosial, tantu iha nivel rai-laran no mós rai-li'ur nian, hodi kontribui ba esforsu internasionalizaasaun ekonomia.

**Iha Komunikaasaun Sosial nian** – Ita fó ona hakat sira ne'ebé importante tebes atu garante imprensa ida ne'ebé moderna, profesionál, kredivel no livre, tuir prátika internasionál hirak ne'ebé di'ak-liu, hodi garante asesu ba fonte informasaun nian sira, ba liberdade editorial, ba protesaun independénsia, ba sijilu profesionál no ba direitu atu kria jornal, publikasaun no meu difuzaun nian sira-seluk.

Liberdade Imprensa no Meiu Komunikaasaun sira-ne'e hetan ona apoiu, to'o oras ne'e, ba política ida ne'ebé maka la'o hela, kona-ba regulamentaasaun progresiva setór ne'e nian liuhusi estabelesementu órgaun reguladór independente ida – Konsellu Imprensa – ne'ebé garante deontolojia husi interveniente oin-oin.

Ami mós hakarak hametin no haforsa Ajénsia Notisioza Nasionál, TATOLI; dezenvolve no habelar RTTL (ne'ebé inklui hadi'a infraestrutura no ekipamentu sira); formasaun ba jornalista (hodi fó atensaun liu ba

ba kestaun sira hanesan partisipasaun jéneru nian); diversifika, dezenvolve no habelar setór ne'e, ho atensaun espesiál ba rádiu komunitária sira no ba kooperasaun intersetoriál no internasionál.

**Iha Relijiaun nian** – Governu sei kontinua fó apoiu no kolabora ho instituisaun oin-oin no konfisaun relijioza sira, hodi estimula inisiativa sira ne'ebé promove formasaun karáter morál, étiku no relijiozu ne'ebé promove sensibilidade ida ne'ebé voluntária, solidária no tolerante liu, ho kondisaun fundamentál sira ba dezenvolvimentu armoniozu iha família, comunidade no iha sociedade.

Ami mós hakarak hakle'an parseria kooperasaun ne'ebé estabelese ona iha edukasaun, saúde, dame no justisa, iha âmbito Rezolusaun Parlamentu Nasionál (18/2015, *loron 11 fulan-novembru*) ne'ebé ratifika akordu ho Santa Sé, no rekoñese papel Igreja Katólíka nian iha Sociedade Timorensé.

**Iha Sociedade Sivil** – ami hakarak promove sidadania ida ne'ebé iha asesu ba informasaun, ativa no partisiva liu ba sidadaun sira, tuir prevee iha Objetivu Estadu nian (*iha Konstituisaun Artigu 6<sup>u</sup>*), iha dezenvolvimentu no rezolusaun ba kestaun prinsipál sira interese nasional nian.

Ba ida ne'e, ami sei enkoraja atu harii no hametin organizaun naun governamental sidadania nian (grupu, asiasaun no fundasaun sira), ne'ebé espesializada iha setór atividade oin-oin, no hakarak atu halo parseria, iha: elaborasaun polítika no programa sira, ka iha monitorizaun, akompañamentu no fiskalizaun ba atividade governativa sira nian, hodi promove kompromisu informasaun, transparénsia no fiskalizaun (auditoria sosiál) ne'ebé ami maka halo ona.

**Hela-Fatin** – ami mós halo ona rejistu ida iha tinan 2015, ne'ebé hatudu progresu boot iha tinan hirak ikus ne'e, “38% husi konstrusaun uma nian ne'ebé nia didin-lolon (*parede*) uza ona bloku, 76% husi uma nia kakuluk uza ona kalen (*zinku*) no 48% mak uza ona azuleju ka simentu”. Ami mós hala'o ona esforsu boot atu harii uma sosiál sira iha âmbito Uma MDGs nian, iha programa formasaun husi SEFOPE.

Maske indikador sira ne'e favoravel, sei iha tan serbisu ne'ebé mak atu hala'o hodi fornese uma ba Timoroan sira ne'ebé maka presiza, mukit liu no la hetan tulun, hodi bele hetan hela-fatin ne'ebé dignu, “*ho dimensaun loloos ba família hirak ne'e ho kondisaun ne'ebé moos no konfortu, hodi prezerva ninia intimidade pesoál no privasidade*”.

Ami sei promove iha Munisípiu ka Rejiaun ida-idak, Planu Boot ida, hodi define área rezerva ekolójiku ka agríkola no área urbana sira, ne'ebé maka bele defini planu pormenór urbanu ho programasaun husi ekipamentu hirak ne'e ka infraestrutura sira apoiu nian ne'ebé liga ba uma no edifísiu sira husi servisu báziku nian: abastesimentu bee, saneamentu, eletrisidade no komunikasaun.

Governu ida ne'e labele kontinua tan fó lisensa ba projetu ka konstrusaun sira bainhira laiha ligasaun nesesária ho servisu báziku sira. Nune'e, ami mós lakohi atu diskrimina projetu boot no ki'ik sira, atubele harii uma sosiál ba família sira ne'ebé presiza liu ka inagura empreza ki'ik ka média husi empededor timoroan, ne'ebé ami konsidera iha valór no direitu hanesan, atu simu servisu públiku Estadu nian.

Iha tempu hanesan, laiha sentidu, hodi kontinua atu hadi'a sidade no emprendimentu sira ne'ebé laiha ordenamentu, bainhira ita laiha asesu ba estrada, transporte, abastesimentu ka komunikasaun nesesária ba ita-nia moris no ba ita-nia atividade sira.

Daruak, ami sei **Kontinua Dezenvelope iha Infraestruturá sira**, ne'ebé investe la'os de'it iha konstrusaun ba estrada, ponte, portu, aeroportu sira, maibé mós ba utilizaun, konservaun, manutensaun no reparasaun di'ak iha tempu loloos, hodi garante katak prazu utilizaun iha tempu ne'ebé kumpre no, karik bele hanaruk tanba monitorizasaun no akompañamentu.

*“Infraestruturá importante tebes ba desenvolvimento ekonómiku no sosiál, ho eskala no kustu asosiadu ba implementasaun iha rede infraestruturál [gasta ona 3,062 biliaun iha kapitál desenvolvimento husi tinan 2007 to'o 2017], hanesan dezafiu boot ida atu sustenta produtividade, hodi kria serbisu (empregu) no ba desenvolvimento iha setór privadu iha nivel nasionál.*

*Tanba ne'e, planeamentu, orsamentasaun, monitorizasaun no avaliasaun hanesan parte importante iha estratéjia ida-ne'e. Nune'e, iha tempu badak, Governu sei halo levantamentu detalladu liuhusi infraestruturá no projetu sira ne'ebé maka la'o hela, hodi avalia fila-fali, koriji no estruturá fila-fali planu infraestruturá, halakon asimetria (diferensa) no taka lakuna (falta) hirak ne'ebé maka sei eziste iha país ne'e.*

Ami mós sei presiza profesionalizmu barak ba rekursu umanus no ba empreza kontratada sira iha setór ne'e, atu hetan rezultadu ne'ebé di'ak liu iha planeamentu, monitorizasaun, inspesaun no fiskalizaun no mós kualidade, sustentabilidade no ponderasaun ne'ebé di'ak liu ba kustu benefísiu sira.

Iha misaun ne'e, ita tenke implementa kolaborasaun ida ne'ebé estreita ho organizaun espesializada sira auditoriál sosiál nian, ne'ebé eziste iha sosiedade sivil.

Iha parte leten, ami sei kontinua atu investe iha planu infraestruturá ne'ebé orienta ona ba mobilidade (rede estrada, transporte sira), ba moris-di'ak sidadaun sira nian (*bee, saneamentu, eletrisidade no telekomunikasaun sira*), ba prestasaun servisu (*enerjia, meteorolojia, servisu postal nian sira*), ba estabesimentu **Timor-leste ida ne'ebé: modernu, dezvoltidu no prósperu!**

**Iha Rede Estrada nian** – ami investe tiha ona, iha tinan ikus ne'e, besik millaun 600 hodi hadi'a no reabilita estrada (estrada nasionál 1,446 km no estrada rurál 3,306 km). Ami aposta ba dalan transversál ne'ebé liga ho Mota-ain, Timor-Leste ba Timor Osidental no ba Oekuse. Ami mós liga kosta sul ho auto-estrada, prepara resepsaun no apoiu ba infraestruturá boot iha setór Mina-rai nian. Ami mós aposta ligasaun entre Kosta Norte no Kosta Sul, liuhusi koredór Manatutu ba Natarbora, Dili ba Same ka ba Ainaru. Ami mós sei taka dalan ba asesu ne'ebé liga ba portu tibar iha futuru ka sidade Fronteira Maliana. Ami mós sei harii no reabilita ponte hamutuk 438.

Ita sei kontinua ho objetivu boot nasaun nian atu harii no hadi'a estrada ne'ebé presiza ba ita-nia desenvolvimento, la'os de'it estrada nasionál sira, autoestrada sira ka sirkunvalasaun sira (barreira ne'ebé

mak uza atu kontrola transporte hodi tama no sai sidade), maibé mós estrada rurál no munisipál sira, ne'ebé konsidera importante tebes-tebes ba movimentu ema no sasan nian no ba sirkulasaun produtu sira husi itania ekonomia.

**Bee no Saneamentu Báziku** – ita sei kontinua investe iha asesu ba abastesimentu bee-moos no saneamentu, jeneralizadu [ba hotu-hotu], seguru no sustentavel, la'os de'it iha nivel sidade nian, maibé mós, neineik maibé beibeik iha nivel rurál, tanba ita fiar katak servisu sira-ne'e importante tebe-tebes ba familia sira hotu, ne'ebé kontribui ba sira ninia kreximentu saudavel no armoniozu.

Tuir estimativa tinan 2015 nian, besik uma-kain hamutuk 78,5% mak iha ona asesu ba bee no saneamentu, ne'ebé fó ona benefísiu ba populasaun hamutuk 49%. Ita labele konforma ho número sira-ne'e. Ita hakarak no sei halo di'ak liután ida-ne'e, hodi implementa Planu Boot sira ba Bee no Saneamentu iha Munisípiu, Rejiaun sira no iha kapitál Dili (*ne'ebé inklui drenajen no rekolla, tratamentu halakon bee-dalan* (ezgotu), hodi reforsa tan apostu iha konstrusaun ba estasaun tratamentu rezíduu sira (urbanu, industriál no perigozu sira) iha Tibar no kriaun Laboratóriu Nasionál Rezíduu nian ida.

Ita mós sei kontinua haka'as an atu hadi'a koordenasaun no jestaun rekursu bee nian, hodi liga rekursu hirak, bainhira bele, ho setór sira-seluk (*hanesan ezemplu iha enerjia ka agrikultura*), hodi promove, ba efeitu ida-ne'e, identifika fonte ka bee-matan foun sira, armazenamentu (ne'ebé inklui udan-been) no ba distribuisaun bee moos, hodi fó benefísiu ba uma-kain sira no ba servisu prinsipál sira Estadu nian (ho atensaun liu ba abastesimentu hodi estabese ensinu no saúde nian), hodi hadi'a kapasidade atu tahan iha tempu bailoro no iha mudansa klimátika nian sira.

Ita sei kontinua hatán ba konsumu doméstiku ne'ebé sa'e ba bebeik, maibé mós ba konsumu industriál ka nesesidade irigasaun ba kampu ágrikola sira, hanesan akontese ona iha Belutu, Bebuí no Laleia.

Ho liafuan badak, iha setór bee no saneamentu, tuir **Filozofia ida husi 3 R's: "Reaproveitamentu, Reutilizasaun no Resiklajem"**.

**Iha Energia sira** – ita sei kompleta ita nia investimentu ba distribuisaun eletridade no diversifikasaun fonte enerjia (tuir ezemplu husi mini-ídrika (ídrika-ki'ik) iha Gariawai, Loihunu no Dare Ainaru no programa painél solár sira ba fatin sira ne'ebé mak izoladu), ho hanoin atu garante fonte abastesimentu ne'ebé baratu liu, moos no sustentavel (ezemplu, adapta sentrá elétriika óleu pezadu, hodi utiliza gás naturál husi Greater Sunrise, ho emisaun karbonu ne'ebé uitoan).

Investe ona biliaun hamutuk 1,2 iha setór eletridade (besik millaun 85 kada tinan), ne'ebé fó ona garantia mai ita, eletridade bele lakan loroloron iha oras 24 nia laran ba populasaun. Ita harii ona sentrá elétriika 4, iha Hera, Betanu, Kumoro no Oeskusi ho poténsia 300 MW, no iha investimentu sira ne'e hotu, ita fó liu prioridade ba Veteranu sira no sira nia organizasaun hodi lidera kontrusaun ba infraestrutúra hirak ne'e.

Hein katak ita bele kompleta liña transmisaun 603 km, ne'ebé sei uza mós atu liga País ho fibra óptika liuhusi sub-estasaun 9.

Ita sei kompleta modernizasaun rede foun husi tensaun média no baixa, hodi garante ba ita-nia konsumidór sira, kobertura di'ak, ne'ebé estavel liu no segura.

Ita harii ona uma hamutuk 104,229, maibé ita mós hakarak totalidade ne'e to'o ba uma-kain sira hotu iha Timor laran tomak, no iha fatin hirak ne'ebé maka teknikamente la posivel, ita bele iha garantia ho fonte alternativa sira (hanesan: gás natural, eólíka, idroelétrika no biomasa) hanesan akontese ona ho painél enerjia solár sira ne'ebé instala ona iha uma hamutuk 23,000 no iha postu ketan-raik nian.

**Iha Transporte** – setór ida ne'e konsidera importante tebe-tebes la'os de'it ba movimentu ema no ba sasan nian, maibé mós ba objetivu transversál oioin ba ita-nia programa dezvoltimentu nian, ne'ebé justifika implementasaun iha *Planu integradu Boot ba setór transporte nian sira*.

Ba ida-ne'e, ita sei implementa *sistema jestaun mobilidade* nian foun ida iha área urbana sira, hodi harii Terminál Transporte Integradu sira, ne'ebé konsentra hamutuk iha fatin ida de'it (*one-stop-shop*), karik iha possibilidade, servisu oin-oin operadór transporte públiku no privado nian (autokarru entre-sidade, mikrolet sidade nian, taksi, transporte sasán fa'an nian, nsst), no servisu komersiál (merkadu munispál, loja komersiál, servisu públiku komunikaun, bankáriu, no seluk tán).

Ita hakarak atu Terminál Transporte Integradu no Kombinadu sira ne'e, sai duni hanesan sentru dezvoltimentu sidade nian sira ne'ebé liga *movimentu inter-modál sira* (servisu rodoviáriu sira ho portu marítima Dili, Tibar, Oekusi no aeroportu Dili, Suai no Oekusi) ba *oportunidade dezvoltimentu ekonómiku* hanesan ida ne'ebé akontese iha ezemplu internasionál sira ne'ebé di'ak liu.

Ami sei kontinua investe iha modernizasaun no kualidade transporte públiku sira nian, ho atensaun espesiál ba ninia konfortu, efisiénsia no seguransa husi ninia ekipamentu sira ne'e rasik.

Iha biban hanesan ita sei habelar oferta portuária, hodi harii ekipamentu foun iha Suai, Kom, Ataúru, Kairabela, Vemasi, Manatutu no Marina ida besik Portu Kruzeiru nian iha Dili, ne'ebé sei kontribui ba ita-nia aposta ne'ebé maka'as tebes iha Turizmu, iha aspetu rekreiu no lazer, aventura, peska desportiva ka atu fó apoiu de'it ba dezvoltimentu setór peska ka ba transporte alternativu sasán fa'an nian sira.

Ita hakarak kria rede transporte marítima nian ida, ho operadór oin-oin atu tula pasajeiru, sasán fa'an nian ka produktu fresku sira, hodi rekupera ita-nia esperiénsia istória kona-ba “barkasa sira” (*tipu ró ne'ebé fasil atu enkosta*) ne'ebé adapta no atualiza duni ba ita-nia tempu. Ita tenke hatene aproveita ita-nia kondisaun hanesan illa, ne'ebé fó mai ita via marítima hanesan liña “mobilidade ida ne'ebé di'ak tebes”.

**Iha Meteorolojia** – ita tenke programa estabelesimentu laboratóriu meteorolojia nian ida ne'ebé ligadu no koordena loloos ho operadór transporte nian sira (aéreu, marítimu ka terrestre) no ho forsa ka servisu seguransa nian sira ne'ebé integra Protesaun Sivíl nasional no internasionál/rejionál (*liuliu ho ita-nia viziñu sira*).

Ita presiza dezenvolve sistema integradu ida ne'ebé garante mai ita prevensaun, preparasaun no asionamentu meu ka rekursu sira sokorru nian ba vítima sira bainhira akontese fenomenu, dezastre ka kalamidade iha nivel meteorolójiku.

**Iha Telekomunikasaun** – ita konsege halo progresu boot barak iha demokratizasaun asesu ba servisu movel telefone nian, ne'ebé kobre hamutuk 81% iha tinan 2015 no oras ne'e kobertura ne'e sa'e liután ba 96% husi área hirak ne'ebé populusaun sira hela.

Asesu ba servisu dadus 3G no 4G nian mós aumenta nafatin to'o oras ne'e, ne'ebé daudaun ne'e disponivel iha sede Munisípiu no Rejiaun nian hotu-hotu.

Ita sei iha serbisu ne'ebé halo atu garante kombate hasoru info-eskluzau iha área izolada no rural sira.

Iha tempu badak ita sei kontinua habelar oferta servisu administrasaun públiku nian sira liuhusi ligasaun iha fibra óptika (*ho destake no prioridade ba Edukasaun no Saúde*), ne'ebé utiliza rede tranzmisaun sira EDDL nian.

Ita sei kontinua aposta iha teknolojia informasaun no komunikasaun nian sira atu alkansa objetivu tranzversál oin-oin husi programa dezenvolvimentu nian, liuliu: iha implementasaun Governasaun Eletrónica (simples liu, besik liu, lais, efikás, efisiente no tanba meu ida ne'e ladún burokrátiku); atu promove ekonomia dijital ida (ho servisu foun banda larga, televizaun dijital terrestre no/ka produktu sira ne'ebé disponibilizadu online, hodi promove negósio sira setór privadu no esportadór sira); no atu garante estrutura ida ne'ebé adekuada kona-ba seguransa sibernética.

Kontinua investe iha liña dijital sira, iha teknolojia komunikasaun nian sira, iha fibra óptika atu hetán ba asesu internet, hodi transforma ita-nia Nasaun no ita-nia Kapital Dili sai “*Sentru Aprendizajen no Teknolojia Foun*” ida ne'ebé loloos .

**Iha Servisu Postal** – ita tenke tuir ezemplu internasionál sira ne'ebé di'ak liu (*hanesan ezemplu Austrália ka Portugal*), iha ne'ebé servisu portál sira implementa filozofia *one-stop-shop* durante tinan barak ona, ne'ebé kombina vantajen tradisionál sira husi korreiu: iha entrega korrespondénsia, livru, publikasaun no tipu enkomenda sira seluk, ho oportunidade foun sira ne'ebé relasiona ho servisu finanseiru sira: liuliu iha kobransa taxa servisu públiku nian, iha pagamentu pensaun ka subsídiu sira, iha transferénsia fundu, ka iha promosaun poupanza individuál sira (*sertifikadu aforru nian*)

Bai ida ne'e ita sei dezenvolve no moderniza Korreiu Timor-Leste nian, hodi halo servisu sira ne'e sai efisiente, lais no fsil liután, hodi kombina servisu sira ne'e, karik iha possibilidade, ho servisu públiku sira seluk Estadu nian, iha perspectiva tranzversál ida no perspectiva rentabilizasaun rekursu no meu sira.

Datoluk, ita sei **Kontinua ho Dezenvolvimentu Ekonomia nian**: atubele garante:

- Média kreximentu ekonómiku ida ne'ebé aas (7.3 % rejista ona husi tinan 2007 to'o 2015, maibé bainhira ita avalia período la'ós eleisaun nian hanesan husi tinan 2008 to'o 2011 ita sa'e ba dijitu rua

*iha valór 11% ba kada tinan. Bele haree katak iha época impase polítiku nian, valór ne'e tun ba 2,37% iha tinan 2017,*

- Kombina ho nivel inflasaun reduzidu (menus husi 2,5% prevee ba tinan 2019),
- Ne'ebé fasilita planu nasionál atu kria empregu (mínimu 60.000 ba kada tinan, hanesan ida ne'ebé rejista iha tinan 2015) auto empregu, empriendedorizmu, ka inovasaun; no
- Ne'ebé permite progresaan sustentada ida husi rendimentu sira (ne'ebé ninia Média rendimentu nian sira iha setór la'ós petrolíferu – aumenta ona husi USD 732 iha tinan 2008 ba 1.174 iha tinan 2015).

Ita hakarak kontinua fasilita ambiente ida ne'ebé favoravel ba negósiu sira no ba dezvoltimentu setór privadu nian, hodi dada investimentu foun ho dimensaun boot sira (hanesan Timor Plaza ka fábrica serveja Heineken) no parseria públiku privada foun sira (hanesan Portu Tibar no TL Cement) iha área estréjika sira ba ita-nia dezvoltimentu sustentadu.

Ita tenke promove alargamentu no diversifikasaun husi setór Privada iha ekonomia, ne'ebé to'o oras ne'e depende liu ba asaun administrasaun públika nian (46% husi kreximentu husi tinan 2010 to'o 2015), ka husi setór konstrusaun nian (24% husi kreximentu iha período ne'ebé hanesan).

Ita mós hakarak promove konsumu internu (ne'ebé rejista ona aumentu ida ho total 160% husi tinan 2004 to'o 2014). Maibé ita lakohi atu konsumu ne'e kontinua limitadu de'it ba materiál konstrusaun nian, ba akizisaun transporte individuál sira (kareta no motór hamutuk 19,498) ka ba akizisaun (sosa) ekipamentu no servisu telekomunikasaun nian sira (subskritór hamutuk 190,444 ) ka sasán konsumu nian sira seluk ne'ebé ita importa.

Ita hakarak promove medida sira autosufisiénsia no enkorajamentu nian ba produtividade interna, ne'ebé kontribui atu hamenus dependénsia esterna ne'ebé maka'as liu, no ne'ebé garante seguransa ai-han ne'ebé aumenta ba beibeik husi ita-nia produsaun agríkola, pekuária no peska.

Ita tenke aposta liután iha empreza ki'ik no média sira, iha asosiasaun no kooperativa produtiva sira, iha servisu especializadu sira, iha diversifikasaun ho empreza no investimentu sira ne'ebé hatene potencializa no aproveita rekursu barak: husi turizmu, agrikultura, floresta, pekuária, minériu no tasi; liuliu ba área merkadu nian sira ne'ebé ho lukru boot liután no vantajen ne'ebé boot.

**Iha Agrikultura, Pekuária, Peska no Floresta** - ita bele no tenke kria lalais rede abastesimentu internu ba produktu ortíkola (produu to'os nian), ai-fuan, na'an no ikan fresku, hodi aproveita infraestrutur foun sira (sistema rega ka transporte, estrada, ponte, portu no aeroportu), atu nune'e hamenus dependénsia ba rai-li'ur no aumenta esportasaun sira.

Investe iha rede produtiva sira, kona-ba abastesimentu no esportasaun ne'ebé kontribui ba ita nia kompetitividade iha nivel internasionál, liuliu iha *nicho* merkadu nian oin-oin, hodi valoriza ita-nia marka “Made in Timor-Leste” no liga marka ne'e ba sertifikasaun ita-nia produu sira ho qualidade ekolójika no biolójika ne'ebé aas ka 100% orgánika.



Ita hakarak prodús barak liután kafé, foos (73% husi nesesidade nasional to'o tinan 2023, batar, raíz no tubérkulu [ezemplu hanesan aifarina no seluk-seluk tán], ai-fuan no modo, na'an no ikan, susu-been, liuliu iha produtu sira ne'ebé mak iha rendimentu aas iha merkadu internasionál (hanesan nuu, baunilla, kajú, fore-keli, fore-rai, pimenta, kinur, ai-lia, kanela, koloraun, nós-moskadu, kakau), sempre ho selu produsaun nian ne'ebé utiliza fertilizante (rai-metan ka adubu) orgániku, no evita pestisida ka prosesu kímiku sira atu halo kontrolu ba peste ka insektu, hodi konsege hetan rezultadu ne'ebé di'ak liu ba produtór no esportadór sira.

Ita tenke investe liután: iha investigasaun no peskiza (iha eskola sekundária téknika vokasionál no iha institutu politékniku ka akademia sira); iha laboratóriu análice no sertifikasaun nian sira; iha formasaun rekursus umanus nian (especializadu iha produsaun, distribuisaun, marketing, abastesimentu, armazenamentu, iha prosedimentu kuarentena no aduaneiru nian sira; no iha esportasaun produtu sira, hodi hetan benefisiu husi instrumentu internasionál sira hanesan husi organizasaun mundiál saúde nian, no husi akordu Cotonou ba nasaun sira ACP, no seluk tán); iha kriasaun rezerva agríkola no biolójika sira (ne'ebé garante katak rai sira ne'ebé di'ak liu sei kontinua uza de'it ba prátika agríkola no ne'ebé garante rezerva/barrajen bee nian); iha sustentabilidade mákina no ekipamentu sira nian (hodi garante ninia utilizaun, konsersasaun, manutensaun no reparasaun ne'ebé di'ak iha ofisina kualifikada); iha *inovasaun (produsaun ne'ebé la halo iha rai leten – idroponia)*; iha empriendedorizmu no auto-empregu (*empreza familiár no kooperativa sira*).

Iha pekuária (*karau, bibi, fahi no manu*), ita presiza investe liután iha vasinasaun no dezparazitasaun, iha kontrolu ba moras animál nian, iha saúde veterinária, iha nutrisaun no produsaun rasaun sira (aproveita rezíduu ne'ebé maihusi ikan), iha peskiza no dezvoltamentu rasa hirak ne'ebé adapta ho ita nia klima no kondisaun, iha sertifikasaun kona-ba orijen ne'ebé hetan kontrolu, iha indústria privada oho na'an nian sira (*Matadoru Nasionál Tibar*), refrijerasaun, embalajen no distribuisaun ba konsumu, hodi promove rede loja fa'an na'an fresku nian ida; no susu-been nian.

Ita mós sei investa liután iha Peska, iha rikeza sira ne'ebé ita-nia mota sira ka ita-nia liña kosteira ne'ebé naruk tebes ka zona ekonómika eskuziva fó mai ita, hodi lansa baze ba futuru kandidatura ida ba esplorasauun plataforma kontinentál.

Tanba ne'e ita sei aposta liután: iha produsaun akuakultura (*estrasaun alga no kriasaun ikan iha bee midar nian, boek, abalón, kadiuk, pérola no ostras/ramís*) hodi promove rendimentu ne'ebé di'ak liu ba komunidadade sira hela besik tasi-ninin; iha jestaun ne'ebé bazeia ba kritériu ba peska sira iha tasi klaran (*ho atensaun ba mallajen mínima sira, período defezu, espésie protejida sira, repovoamentu natural*); iha kontrolu ba peska ilegál; iha konsersasaun ikan hirak ne'ebé peska ona (*refrijerasaun, salga, fumajen [tamun] ou sekajen [habai]*); iha infraestrutura apoiu nian (*portu, ponte-kais no ró para fatin*); iha investigasaun no formasaun.

Iha floresta (ai laran) ita tenke implementa planu konsersasaun no investimentu florestál sira, ne'ebé garante repovoasaun (kuda filafali) espésie sira (*ai-teka, ai-mognu, Cedru mean [cedro vermelho] ai-naa ka*

*ai-kameli – ai-horis millaun 1 kada tinan*), no sustentabilidade husi rekursu sira ne'e, ne'ebé okupa 50% husi área terrestre nasionál nian.

Investe liután iha sentru viveiru nian sira, iha investigasaun no formasaun no iha implementasaun estratéjia kona-ba komersializasaun Au, (fa'an au) ne'ebé aleinde bele lori grau rentabilidade ida ne'ebé aas, kontribui mós atu evita rai halai.

**Iha Petróleu no Rekursu Minerál** sira – ita iha benefísiu atu soi rikeza enerjética boot sira, maibé ita tenke tau ita-nia esforsu maka'as atu labele hetan “*maldisaun rekursu*”, hodi harii ponte sira ne'ebé halo ligasaun ida metin entre rekursu no progresu.

Nune'e, ita hakarak kontinua fó prioridade ba tasi mane, iha Projetu inter-setoriál Tasi Mane nian, iha ne'ebé ita hakarak instala indústrhia petrokímika moderna ida, hanesan polu jeradór (sentru jeradór) dezentvolvimentu ekonómiku-sosiál.

Ita hetan ona, foin daudaun ne'e, vitória iha Direitu Internasionál kona-ba negosiasaun Ketan-Tasik (Fronteira Marítima) ho Austrália. Maski nune'e, ita-nia negosiasaun kona-ba ketan-tasik (fronteira marítima) no ketan-raik (fronteira terrestre) ho Indonézia kontinua pendente no liuliu, negosiasaun hirak ne'ebé susar tebes atu garante konstrusaun kadoras gás naturál (gazodutu) Greater Sunrise nian ba Beasu iha Tasi Mane.

Ita sei aproveita no rentabiliza rekursu sira seluk, hodi fasilita aparesimentu indústrhia foun sira (*inklui indústrhia simentu no mármore, oleira, vidreira iha Baukau*) no servisu sira, ne'ebé konsentra hamutuk iha parke industriál munispál sira, iha sidade foun no sentru (polu) dezentvolvimentu nian foun sira (*liuliu Baze Lojística Suai, Refinaria Petrolífera no kompleksu Petro-kímiku Betanu nian, no Fábrica Gás Naturál Liquefeitu iha Beasu/Vikeke*).

**Iha Turizmu** – ita hatene katak ida-ne'e hanesan motór importante ida ba dezentvolvimentu atividade ekonómiku sira, ho potenciál boot atu atinje ita-nia objetivu sira atu kria empregu, aumenta rendimentu iha eskala familiár no komunitária, atu diversifika no atu aumenta pezu husi setór privadu Ekonomia nian, hodi kontribui mós ba salvaguarda no promosaun patrimóniu naturál, artística no kulturál Timor-Leste nian.

Timor-Leste iha potencialidade boot barak atu kria “*Marka no Destinu Auténtiku ida*”, ne'ebé liga ba qualidade husi servisu hirak ne'ebé halo, lae ba masifikasaun, ba seguransa no kriminalidade ne'ebé menus, ba diversidade no orijinalidade, ne'ebé hatene aproveita: furak naturál husi paizajen, biodiversidade (*husi ita nia enkuadramentu jeográfiku iha triángulu korál*) ita-nia istória ne'ebé riku no ita-nia patrimóniu kulturál úniku, ne'ebé envolve Povu no Komunitade barak tuir ida ne'ebé define ona iha *Política Nasionál kona-ba Dezentvolvimentu Turizmu*.

Ita iha ambisaun atu kria fluksu anuál no sustentavel ida hamutuk vizitante 450,000, ne'ebé fahe ba ninia vertente oin-oin: natureza, foho, istóriu, kulturál, gastronómiku no relijiozu, komunitáriu no etnográfiku, aventura no desportivu, ekolójiku ka simplesmente lazer, balneár no rekreativu nian;

Hodi hetan proveitu liuliu husi prezensa komunidade estranjeira nian ne'ebé hela iha ita-nia rain (*osidental, xina, malaiu no indú*) ka rejionál (*Japaun, Korea Sul, Honkóng, Makau*), no data festa ka períodu férias nian (*karnavál, Páscoa, férias tempu bailoro nian, fulan Na'in-Feto nian, feriadu nasional, Natál; Tinan Foun no loron boot Xina nian, Idul Adha no Idul Fitri, no seluk-seluk tán*) ka realizasaun eventu nasional no internasionál boot sira (*kongresu, konferénsia, simeira, jogu desportivu, espetákulu, konsertu, festivál Tour Timor, halai taru ró Darwin-Dili, karavana artístika, no selu-seluk tán*).

Setór Turizmu nian hanesan mós **setór tranzversál ida husi ita-nia ekonomia**, benefisia no promove investimentu ne'ebé hala'o hela iha infraestrutura bázika sira (*estrada, portu, aeroportu, transporte*), iha kapital sosial (*eskola téknika no politéknika otelaria nian, servisu restaurante nian*) iha konsumu sasán no servisu sira (*industriál, komersiál no rekreativu*) ho grau rentabilidade imediata ne'ebé aas.

Tanba ne'e, ita sei kontinua fó prioridade ba setór ne'e, ho: konstrusaun Marina no Portu Kruzeiru nian ida iha Dili, reabilitasaun orla marítima (liña ne'ebé haketak tasi no rai-maran) iha Dili, valorizasaun Merkadu Tais (*hanesan pontu prinsipál turístiku ida mós no ne'ebé hetan vizita barak liu*), estabelesimentu parke temátiku sira no diversaun nian sira (*inklui parke akuátiku ka jestaun lafaek nian*), zona turizmu nian sira ho informasaun sira ne'ebé di'ak liu no pakote turístiku abrajente sira.

**Iha Komérsiu nian** - ita sei kria polítika komersiál sira ne'ebé kontribui ba sirkulasaun di'ak produktu sira husi setór primáriu no sekundáriu, iha nivel nasional no internasionál, hodi kontribui ba aumentu husi esportasaun no rikusoin nasaun nian.

Ba ida-ne'e, ita sei aposta ba: modernizasaun no ba espansaun Merkadu Munisipál Integradu sira ho servisu sira seluk (*inklui terminál estrada nian, terminál bankária no mós terminál komunikasaun nian sira*), iha filozofia *one-stop-shop* nian ida.

Kontinua fó aten-barani no haforsa knaar setór privadu komérsiu nian, liuliu, iniciativa hirak ne'ebé inovadora, empriendedora, kriativa liután, no bele diversifika oferta, no promove kriaun sentru komersiál ho dimensaun ki'ik, média no boot (*no fó apoiu, hanesan ezemplu, ba kompleksu Turístiku Otel, Sentru Komersiál no Konvensaun Golgota nian, besik Aeroportu Internasionál Comoro Dili*).

Ita mós kontinua aposta iha qualidade, ijiene no seguransa iha serbisu ka seguransa ai-han, hodi haforsa asaun inspensaun no fiskalizasaun nian husi autoridade competente sira (AIFESA, SEFOPE), hodi promove sistema ida atu hatán ba preokupasaun sira no nesidade husi traballadór sira, empregáriu sira, asosiasaun sira no kámara komérsiu indústria nian no halibur/atende reklamasaun husi kliente sira hodi bele hetan rezultadu di'ak ba kliente sira nia preokupasaun.

**Iha Indústria** - ita iha vizaun atu implemeta ekonómia ida ne'ebé moderna no diversifikada, ne'ebé depende, hanesan temi tiha ona iha kotuk, ba investimentu ne'ebé halo atu haburas industria prinsipál tolu: agrikultura, turizmu no petróleu.

Ita moos iha kondisaun sira atu desenvolve indústria subsidiária hirak seluk husi setór primáriu produsaun nian sira, hanesan ezemplu:

Iha agroindústria, hodi transforma na'an, susuben, ikan, sereál, no produktu agríkola sira seluk, iha subproduutu hirak ne'ebé maka di'ak liu natureza biolójika nian;

Iha transformasaun matéria prima sira, ba: emabalamentu [falun] produktu sira, mobiliáriu, materiál konstrusaun nian (mármore, azuleju, bloku, tijolu, tella sira, nsst),

Iha promosaun Marka Referénsia nian sira, hamutuk ho potenciál esportadór sira, ho atribuisaun naran ne'ebé hetan kontrolu ka ho sertifikasaun kona-ba qualidade, bilójika ka 100% orgánika, ne'ebé orienta nixu sira Merkadu nian ne'ebé halo ona selesaun no folin ne'ebé maka'as.

Iha rekolla, tratamentu no prosesamentu rezíduu sira, hodi promove filozofia ida indústria nian ne'ebé bazeia ba R's, husi Reaproveitamentu, Reutilizasaun no Resiklajen, ho konstrusaun Unidade Industriál ida iha Tíbar. Ita iha preokupasaun liuliu ho rezíduu husi plástiku, vidru, alumíniu, no metál sira, surat-tahan, pillu no bateria sira, ho atensaun espesiál ba rezíduu perigozu sira.

Ita hakarak mós hamenus neneik maibé beibeik ita-nia dependésia ba rai li'ur, hodi promove auto-sufisiénsia kona-ba produktu ai-han, konstrusaun, petrólikeru, enerjétiku sira no sasán konsumu nian sira seluk, hodi bele hamosu empreza mikro, ki'ik no média sira, ho dimensaun familiár ka kooperativa, ne'ebé la estraga ambiente.

Ita sei haforsa apoiu ba indústria sira ne'ebé eziste ona iha setór masin, mina-nuu, sabaun, espesiaría no bee garafa nian, no seluk seluk tan.

**Setór Privadu** - la haree ba nia vokasaun no dimensaun, ba ita hanesan motór prinsipál ida husi motór prinsipál sira seluk ekonomia nasional nian, ne'ebé garante kriaun empregu (ba populasaun ida foin-sa'e ne'ebé barak liu ho pursentu 51,24% ne'ebé ho otas tinan 20 mai kraik), sai hanesan fatór boot ida husi fatór sira seluk atu kombate moris-kiak no hadi'a kapitál sosiál nasaun nian.

Ita hakarak kria ambiente ida ne'ebé fó biban: ba negósiu sira, ba harii empreza sira, ba investimentu, ba estabesimentu parseria estratéjika, kooperasaun no formasaun, ho atensaun liuliu ba modernizasaun, diversifikasaun, inovasaun no empriendedorizmu (harii empreza).

Ita sei halo esforsu hirak ne'ebé envolve Universidade sira, Ajénsia Apoiu ba Investimentu nian sira (hanesan IADE, SERVE, TradeInvest), Kamára Komérsiu no Indústria (CCI's) sira no Munisípiu sira iha kriaun inkubadora empreza ka inkubadora indústria nian sira.

Ita sei aposta; iha sei hasai obstákulu sira, iha asesu ba informasaun no *know-how*, iha organizasaun parke industriál munisipál sira (ezemplu mak ida besik Portu Tíbar ne'e), Sentru Negósiu sira, ne'ebé kompletu ho servisu públiku apoiu nian sira ne'ebé importante (ho distribusaun eletrisidade, bee, saneamentu, komunikasaun sira, no internet) no hetan lisensa ba atividade empzeziál no industriál (*ho atribusaun lisensa prévia sira, ezemplu lisensa ambiental*).

Ita sei harii Banku Investimentu Timor-Leste (BITL), atu kapitaliza Banku Nasionál Komérsiu Timor-Leste nian (BNCTL, sigla iha lian portugés) iha ekonómia no regula seguru sira, atubele estabese pakote insentivu no garantia agrupadu nian ida iha “guia investidór nian”.

Ita hakarak sai pro-ativu liután: iha apoiu ba kriaun empreza mikro, ki'ik, médiu no empreza ho dimensaun boot sira, kria kooperativa no parseria estratéjika sira entre setór públiku no privadu.

Ita sei fó atensaun liuliu ba implementasaun husi projetu dezvoltimentu trilateral, ne'ebé sei fó biban ba ekonomia ne'ebé maka maihusi konetividade, infraestrutura, transporte no ligasaun ho ita-nia viziñu sira, ne'ebé koñesidu ho naran “*Triângulo de Crescimento*” entre Timor-Leste, Teritóriu Norte Austrália no Provínsia Timor Osidental Indonézia.

**Iha empregu** – bainhira kapitál sosiál dezvoltolve daudaun (*iha edukasaun, saúde, ka formasaun*), ne'ebé akompaña ho kondiasaun moris nian ne'ebé di'ak liu no infraestrutura bázika sira ne'ebé di'ak liu, ita harii ba daudaun forsa traballu nian ida ne'ebé saudavel, matenek, kualifikada, dixiplinada, no profisionál, atu nune'e bele sai produtiva no preparadu liután atu hasoru ezijénsia sira husi kreximentu no internasionalizaun ekonomia.

Hakarak hatutan tan katak ho espansaun no diversifikasaun ekonómika (*nu'udar temi ona iha leten*), sei aumenta tan biban ba empregu, iha situaun ne'ebé hanesan ba feto no mane sira, hodi hamenus nivel insufusiénsia nian no hodi aumenta seguransa iha serbisu, la'ós de'it ba sira ne'ebé hetan saláriu, maibé mós ba traballadór independente sira ne'ebé serbisu ba an rasik.

Iha tempu hanesan ita sei implementa Sentru Empregu no Orientasaun Profisionál iha Munisípiu idak-idak, hodi garante ba sidadaun idak-idak atu dezvoltolve “Planu Moris nian” ida ba ninia formasaun no dezvoltimentu profisionál, hodi fó aten-brani ba iniciativa empriededorizmu, inovasaun no auto-empregu (harii empregu rasik).

Polítika Governu nian ba setór Empregu hala'o ona durante ninia programa tomak, no hakarak atu to'o ba nia objetivu atu iha tinan lima 5 oinmai bele kria empregu foun hamutuk 300,000 (*ho média 60.000 kada tinan*), ne'ebé sei fó resposta ba ezijénsia sira husi populaun ida ne'ebé Foin-sa'e maka barak liu (*besik 51,24% maka ho otas 20 ba kraik*) no ninia kreximentu lalais tebes.

Ita mós sei aumenta número traballadór nian iha rai-li'ur (*iha ne'ebé ita iha vaga 3,341 iha Korea sul no Australia*), hodi reforsa protokolu kooperasaun nian no hadi'a akompañamentu ba ita-nia imigrante sira. Ita labele, no labele duni atu limita an de'it ba merkadu traballu rai-laran, hodi fó atensaun espesiál ba ita-nia prosesu integrasaun no adezaun ba ASEAN, ne'ebé sei promove beibeik movimentu traballadór sira nian ba merkadu sira seluk, liu-liu sira ne'ebé kualifika liu.

**Iha kooperativa nian** - ita sei kontinua aposta iha setór ne'e, ne'ebé ita konsidera iha importánsia estratéjika ba dezvoltimentu nasional, liuliu iha nivel agríkola, hodi motiva partisipasaun ativa comunidade rural sira nian iha sistema ekonómiku formál nasaun nian.

**Ita tenke hatene katak iha país ida iha ne'ebé 75% husi ninia populasaun hela iha área rural sira** hala'õ knaar iha atividade agríkola ka komersiál ne'ebé liga ba komérsiu ambulante (fa'an sasán la iha fatin fiksi ida) no basar tradisionál sira. Klaru katak dala barak liu husi ekonomia hirak ne'e la hala'õ tuir dalan formál, la tuir regra no la halo rejista estatístiku iha área ekonomia oin-oin.

Ita hakarak muda situausaun ne'e hodi nune'e bele halo rejistu neineik maibé beibeik ba atividade hirak ne'e iha ekonomia formál liuhusi insentivu sira ba reconversaun husi produktu sira, vendedór ka operadór informál sira, família ka kooperativu sira, hanesan benefisiáriu no kontribuinte, husi programa dezvoltamentu kooperativu Estadu nian.

Ita hakarak kontinua investe iha kapasitasaun no formasaun rekursus umanus no iha kapasidade institucionál, iha konsesaun [fó] ferramenta, ekipamentu, matéria prima, liuhusi oportunidade ba kréditu no apoiu osan, ne'ebé bele hadi'a infraestrutura no aumenta qualidade produktu sira, ne'ebé loke dalan ba merkadu no komérsiu tuir regulamentu.

Ita hakarak fó atensaun partikulár ba produsaun Bani-been (ne'ebé inklui produktu sira seluk ne'ebé mai husi bani-been hanesan jeleia no lili); ba produsaun Paun (inklui sementeira sira trigu nian, shorgum (batar ain-naruk), sevada no senteu; técnica dulas nian (moagem) no técnica halo paun nian, ho orientaun ba indústria no atu fahe ba eskola sira); no ba produsaun pekuária no susu-been sira (hodi motiva transformasaun susubeen husi karau-vaka sira, karau-timur no bibi sai fali iogurte no produktu sira seluk ne'ebé halo husi susu-been sira ne'e.

**Iha ambiente** - Maske ita iha iha ligasaun kulturál ne'ebé forte ho kestaun ambiente nian sira, ita bele haree dezafiu no risku balun ba ninia prezervasaun, protesaun, konservasaun no valorizasaun sustentavel ba jersaun sira oin mai.

Dezastre natural sira, ne'e baibain mosu tanba udan, explorasaun ne'ebé la iha ekilibriu (tanba la iha planeamentu agríkola no prosesamentu rezíduu sira) ka tanba destruisaun meu ambiente no ekosistema sira (tesi ai, sunu rai), provoka ona rai halai/rai monu maka'as, kontaminaun bee rai-okos nian no rai no aumenta nivel poluisaun nian.

Ita sei implenta Planu Nasionál kona-ba Ordenamentu Territóriu, hodi reforsa kampaña sira kona-ba sensibilizasaun ambientál, koordenaun entre setór sira no iha kapasitasaun ba institusaun no organizmu hirak ne'ebé sai hanesan responsavel ba jestaun, monitorizasaun no fiskalizasaun.

Ita sei hametin kuadru legál kona-ba jestaun, protesaun no konservasaun ambientál (ne'ebé inklui protesaun espésie no biodiversidade), hodi investe iha formasaun (hanesan ezemplu iha kurríkulu ekolár ho kestaun ambientál sira no iha Eskola Matak (Eskola Verde) sensibilizasaun no regulamentasaun. Ita sei kontinua ho programa sira kona-ba reflorestasaun, ho atensaun liuliu ba viveiru komunitáriu sira; implementa kampaña ida kona-ba oinsá bele hamenus sunu-rai no kombate sunu ai-laran sira; investe iha enerjia renovavel sira (enerjia husi anin, loro-matan nian, no idroelétrika), atu hamenus poluisaun atmosférica; implemeta sistema ida kona-ba rekolla, tratamentu no prosesamentu rezíduu sólidu no líkidu, doméstiku, urbanu no

industriál sira (fó atensaun liuliu ba iha sentru tratamentu Tibar nian), hodi implementa “*política kona-ba zero plástiku*” ida.

Ikus liu ita sei investe iha rede parke terrestre no parke tasi nasional sira nian ida hodi sai hanesan amostra no atu salvaguarda biodiversidade, ne’ebé koordena didi’ak ho rede área protejida no parke nasional sira (PN Nino Konis Santana, PN Xanana Gusmão no Jardín Botánico Francisco Xavier do Amaral).

Dahaat, ita sei **kontinua ho Konsolidasaun Governativa**: liuliu iha Governasaun Di’ak, hodi hadi’a Planeamentu Estratéjiku no ekilibriu husi Finansas Públika.

Ita hakarak “*transforma ita nia rikeza natural sira ne’ebé maihusi ita-nia rai ka husi tasi sira, iha seguransa ai-han, iha saúde, iha produtividade, iha oportunidade kriaun nian, inovasaun no empriededorizmu, iha empregu, iha desenvolvimentu no iha moris-di’ak populasun hotu-hotu nian*”.

Ita hakarak atu diversifika fonte reseita nian sira, sai efisiente liután iha ninia identifikasaun, kobransa no prosesamentu, maibé iha tempu hanesan disponibiliza servisu sira ne’ebé di’ak liu, fó atensaun liután ba nesesidade sidadaun no empreza sira nian.

Mákina Estadu nian ida ne’ebé eletróniku no besik liután ba sidadaun sira. La to’o de’it kobra, multa, fó kastigu, fó sansaun, bainhira, iha tempu hanesan, ita rasik labele: kumpri prazu, hasai desizaun iha tempu útil, atu atende rekursu ka reklamasaun, ka atu prosesa pedidu sira, produktu no merkadoria ho urjénsia, hodi hakat liu tiha burokrásia hirak ne’ebé naruk no komplikadu liu.

Estadu menus la signifika katak ladún iha kontrolu ka efikásia. Signifika ladún iha obstákulu, ho medida sira ne’ebé simples, klaru, integradu, ne’ebé fasilita atividade ekonómiku sosial no ida ne’ebé, karik iha possibilidade, disponivel iha forma tranzversál iha fatin úniku ida, tuir ezemplu sira ne’ebé di’ak liu husi *one-stop-shop* ka *loja sidadaun* nian, ne’ebé eziste iha nasaun sira seluk.

Iha Política Makroekonómika - ita iha ambisaun boot atu mantein taxa dezempregu nian iha de’it díjitu ida, ho kriaun empregu foun hamutuk 300.000 (*média 60.000* kada tinan); atu hamenus kiak pursentu 10%; no atu garante kreximentu ekonómiku liu 7%, ne’ebé sustenta ho aumentu neneik maibé beibeik husi setór privadu ida iha mínimu 10% ba kada tinan.

Ita hatene katak viabilizasaun objetivu makroekonómiku hirak ne’e, depende ba ita-nia kapasidade atu implementa opsaun boot sira husi planu ne’e no ezekusaun orsamentál ne’ebé bazeia ba kritériu, ho rigór, efikásia, ne’ebé promove poupansa meu ka rekursu no hodi evita ona despesizmu [gasta maka’as liu] ka gastu superflu [gastu sira ne’ebé la presiza].

Iha sentidu ida-ne’e, ita tenke hanoin fila-fali katak Nasoins Unidas no Parseiru Internasionál sira investe ona besik dolar biliaun 8 iha ita-nia nasaun, maibé

Depende ba desenvolvimentu transversál, inklusivu no sustentável ne’ebé di’ak husi setór hotu-hotu ne’ebé temi ona iha kotuk, ne’ebé agrupa iha kapital umanu, iha infraestrutura no iha reforsu institusaun públika sira.

**Iha setór finanseiru-** ita hakarak habelar oferta ne'ebé disponivel iha nivel bankáriu, ho kapitalizasaun Banku Nasionál Komérsiu Timor-Leste (BNCTL, sigla iha lian portugés) no iha estabelesimentu Banku Investimentu ka Dezenvolvimentu Timor-Leste nian ida (*haree setór privadu BITL ka BDTL*), ne'ebé sei posibilita impulsu foun ida iha atribusaun kréditu no fundu apoiu nian sira ba dezenvolvimentu empreza sira no projetu investimentu nian sira.

Ita hakarak fasilita, liuhusi husi BITL/BDTL, asesu ba kreditu prazu naruk, ho taxa jurus nian hirak ne'ebé asesivel, hodi fó oportunidade ba empreza Timoroan nian sira atu sustenta an, kria empregu, harii infraestrutura no diversifika ekonomia.

Husi ninia parte, BNCTL sei kontinua ninia knaar hodi hakbesik an liután ba área rural (banku movel), ka munispál, ba konsumidór sira no ba empreza mikro, ki'ik no média sira, hodi demokratiza asesu ba serbisu bankáriu sira.

Ita mós hakarak atu habelar servisu finanseiru sira, ho medida hirak ne'ebé promove aparesimentu operadór no servisu foun sira; kona-ba kréditu (*mutualizmu, uniaun microkréditu*), pagamentu eletróniku (*ho ligasaun ba rede internasionál sira hanesan Visa no Mastercard, no seluk seluk tan*), kona-ba produitu poupanza nian sira (*depóztu tuir prazu, sertifikadu aforru nian, konta poupanza nian ba labarik, joven, estudante sira ka abitasaun*) kona-ba Seguru; ne'ebé enkuadra loloos ho estabelesimentu Rejime Jerál Garantia réal nian\_ ida kona-ba sasán movel no imovel no rezistu ativu sira nian.

Iha nivel Polítika Monetária, ita sei hala'o, liuhusi Ministéri Finansas no Banku Sentráal Timor-Leste (BCTL), estudu no análise sira ne'ebé kle'an kona-ba vantajen no dezvantajen sira husi utilizasaun moeda (osan) dolar ka uza moeda nasional ida rasik.

**Iha Finansa Públika sira** – Ita sei promove dezenvolvimentu idane'ebé bazeia ba diversifikasaun finanseira ida ne'ebé sustentavel, ne'ebé maka bazeia loloos ba reseita no despeza sira ne'ebé transparente no ekilibrada, hodi asume kompromisu no responsabilidade kona-ba prestasaun kontas nian nafatin halo komunikasaun no kolaborasaun regulár ho organizasaun sira sociedade sivil nian.

Ba ida-ne'e, ita sei kontinua investe iha Portál Eletróniku sira ba transparénsia kona-ba orsamentu, aprovizionamentu, ajuda sira no rezultadu sira Governu nian, instrumentu fundamentál sira ba akompañamentu di'ak husi Tribunál Kontas nian, Inspesaun Jerál Estadu, auditor no organizasaun laós govermentál sira.

Ita hakarak habelar tan Reforma Fiskál (*ne'ebé Governu VI implementa ona*) ba Reforma kona-ba Jestaun Finansas Públikas nian ida ne'ebé bele fó possibilidade ba aumentu reseita, hadi'a aprovizionamentu, hametin desentralizasaun finanseira no orsamentasaun ne'ebé bazei ba programa.

Ita iha objetivu atu atinje 17% husi **reseita doméstika sira** husi totál “*PIB- Produitu Internu Brutu*”, iha tinan 2023, atu nune'e bele hasees ita husi dependénsia ba reseita sira husi Fundu Mina-rai nian.



Atu to'o ba objetivu ida-ne'e, ita sei hadi'a mákina fiskál, ne'ebé inklui rekursus umanus no infraestrutura (*alfândega no impostu sira*) apoiu nian sira ba identifikasaun, apuramentu no kobransa ba reseita foun sira. Ita mós sei haree filafali lei tributária sira, no introdús "Impostu ba Valór Akresentadu" (IVA - sigla iha lian portugés).

Husi parte **Despeza** nian, ita sei hametin kapasidade atu finaliza, prosesa no supervizona husi Ajénsia Dezenvolvimentu Nasionál, husi Sekretariadu Projetu Boot sira no Komisaun Nasionál Aprovizionamentu (CNA sigla – iha lian portugés).

Ita mós halo interligasaun (*interface*) entre sistema informátiku finanseiru, no baze informátika sira husi instituisaun relevante sira, atu garante rigór, efikásia, efisiénsia no transparénsia kona-ba despeza no kruzamentu informasaun nian, hodi kombatete fraude ka korrupsaun, hodi transforma neneik maibé beibeik sistema atuál hahú husi "*kontabilidade iha Tezouraria Atualizada*" (*cash basis system*) ba "*Kontabilidade Ezersísiu nian*" (*accrual basis system*).

Instrumentu foun sira-ne'e sei sai esensiál iha kumprimentu ba orsamentasaun tuir programa sira, ne'ebé sei liga orsamentu ba planeamentu ne'ebé ho objetivu, alvu no impaktu klaru sira husi servisu públiku ba populasaun sira, iha prazu badak, prazu médiu no prazu naruk.

Ita mós hakarak atu habelar Parseria Públiku-Privadu sira (*ne'ebé eziste iha Portu Tibár*) no implementa jestaun ida ne'ebé bazeia ba kritéria no kuidadu kona-ba dívida pública sira, empréstimu sira (*tetu didia'k kustu-benefisiu no reenbolsu iha futuru*) no kona-ba Fundu Públiku sira liuliu Fundu Mina-rai no Fundu Seguransa Sosiál nian.

Atu promove investimentu no esforsu kona-ba kriasaun empregu, Estadu ne'e sei promove programa sira kona-ba "Partisipasaun Ekitativa" (*equity participation*) ka partisipasaun iha "asaun sira" ba investimentu iha setór privadu iha Timor-Leste.

Ba ida-ne'e, ita sei haforsa kapasidade husi Empreza Públika sira ne'ebé eziste ona no kria Korporasaun Investimentu Timor-Leste nian. Nune'e, ita hakarak intervein iha programa sira ne'ebé iha retornu aas (*liu fali retornu médiu 3% ne'ebé konsege iha nivel internasionál*) ne'ebé iha efeitu multiplikativu oioin ba dezenvolvimentu sosioekonómiku nasional.

**Iha Jestaun kona-ba Fundu Mina-rai** – ita sei kontinua serbisu hamutuk ho Parlamentu Nasionál no Banku Sentráal Timor-Leste nian, atubele mantein jestaun ida ne'ebé di'ak, transparente no sustentavel kona-ba Fundu Mina-rai nian.

Ita sei kontinua implementa sistema "*kontrolu no ekilibriu*" (*check and balance*) ne'ebé garante jestaun di'ak no transparénsia iha utilizasaun Fundu ne'e nian, no ida ne'ebé garante ona mai ita fatin dahuluk iha Ázia, no fatin datuluk iha Mundu, husi klasifikasaun kona-ba prátika di'ak sira iha jestaun kona-ba rekursu natural sira.

Ita hakarak kontinua investe ho rigór no kuidadu iha merkadu finanseiru (títulu no asaun sira), atubele garante retornu sira ne'ebé aas liuhusi 3% (*iha tinan 2016 rejista ona retornu biliaun 3,444*).

**Iha Jestaun kona-ba Fundu Seguransa Sosiál no Fundu Veteranu sira nian** - Ita hakarak kria protesauun sosiál di'ak ida ba sidadaun hotu-hotu, liuliu ba sira ne'ebé presiza, vulneravel no sira ne'ebé la hetan tulun. Ba ida-ne'e, ita estabesele Institutu Seguransa Sosiál nian ida, atu nune'e bele garante sustentabilidade no transparénsia kona-ba fundu ne'ebé kontribuinte sira no Estadu konfia, hodi aseguara direitu benefisiáriu sira nian ba protesauun sosiál ba tempu naruk.

Iha tempu hanesan ita sei estuda kriaun Fundu Veteranu sira nian ida, hanesan kompromisu atu hadi'a kualidade moris nian no atu aseguara sustentabilidade husi apoiu hirak ne'ebé fó.

**Iha Jestaun kona-ba Patrimóniu Estadu nian** - ita sei estabesele instituisaun koordenaun no jestaun nian, ne'ebé akompaña husi Sentrá Baze Dadus nian ida ho patrimóniu Estadu nian hotu-hotu, movel no imovel, ne'ebé rejista regularmente ninia valór, diminuisaun husi ninia valór no kondisaun utilizaun nian, ho atensaun liuliu ba konsesaun no arrendamentu sira.

Dalimak ita **Kontinua ho Governasaun Di'ak no Kombate hasoru korrupsaun:** ba dezvoltimentu setór públiku ida ne'ebé sai profisional, competente no eficiente liután, bele aumenta konfiansa sidadaun sira nian ba governasaun, implementa opsaun boot sira husi planu ne'e no atu kontribui hanesan motór kreximentu ekonómiku nasional nian loloos.

Governu ida-ne'e fiar katak labele realiza aposta no objetivu sira ne'ebé propoin mai ita, bainhira la iha partisipasaun, akompañamentu no eskrutíniu kontínuu husi Sidadaun sira no sira-nia organizaun sira.

Tanba ne'e, ita asume, responsabilidade tolu ne'ebé importante tebes mai ita atu mantein diálogo permanente ida no atu halo ukun-na'in sira besik liután ba povu:

Dahuluk, Responsabilidade kona-ba Komunikaun, atubele posibilita, karik iha possibilidade, debate públiku ida ne'ebé luan kona-ba opsaun no política oin-oin ne'ebé atu implementa, atu nune'e públiku bele hatene didi'ak kona-ba kestaun, dezafiu no benefísiu sira ba País ne'e, husi desizaun sira.

Daruak, Responsabilidade Kolaborasaun nian ida, ho grupu sidadaun no organizaun sira sociedade sivil nian, ne'ebé hala'o knaar monitorizaun, vijilánsia no akompañamentu ba atividade sira Estadu nian, hodi fó liu atensaun ba reklamasauun no rona hanoin sira kona-ba impaktu sira ne'ebé maka kauza husi medida oin-oin no ba satisfasaun husi benefisiáriu sira servisu públiku sira nian.

Datuluk, Responsabilidade Transparénsia nian ida, iha ezekusaun orsamentál, karik iha possibilidade, liuhusi órgaun sira komunikaun sosiál nian, liuliu ho medida sira ne'ebé ezije esforsu finanseiru ida ne'ebé boot iha ezekusaun orsamentál no ne'ebé ita halo ona hanesan kompromisu ida ba jersaun sira oinmai.

Ita sei sai rigorozu liután ho ita nia an rasik, ho membru Governu sira no responsavel sira administrasaun públika nian, maibé mós sira ne'ebé maka direta ka indiretamente hetan benefísiu husi rekursu no subvensaun sira husi Estadu, ka utiliza sasán no ekipamentu ne'ebé maka servisu públiku sira fasilita

(hanesan: eletrisidade, bee, transporte, komunikasaun, nsst) hodi promove utilizasaun, manutensaun no konservasaun di'ak, atu evita gastu ne'ebé maka'as liu, gastu ne'ebé la presiza ka estragu ba propriedade pública sira.

Atu promove governasaun di'ak no halakon korrupsaun, ita mós sei: haforsa no hadi'a inspesaun no auditoria sira, husi Inspetór Jerál Estadu nian; prevensaun no edukasaun sívika husi Komisaun Anti-Korrupsaun; sistema jestaun, rekrutamentu, progressaun bazeia ba méritu no avaliasaun ba dezempeñu ne'ebé implementa ona husi Komisaun Funsauun Públika; hametin kooperasaun iha prestasaun Konta ba Tribunál Kontas nian, kontinua aposta iha teknolojia informasaun no komunikasaun nian sira hodi implementa Governasaun Eletrónika; desenvolve baze dadus ida ho rejistu kona-ba entidade pública ka privada ida ne'ebé envolve iha korrupsaun; no atu haree fila-fali Lei Pensaun Vitalisia nian atu rejime ida-ne'e integra iha rejime seguransa sosiál kontributivu, nsst.

**Iha Administrasaun Públika** - ema barak maka rekoñese katak durante tinan hirak ikus iha ita-nia independénsia no konstrusaun Estadu nian ita halo ona esforsu boot ida (*ho osan billaun 1,2 maka investe ba saláriu no vensimentu*) atu moderniza no profisionaliza Funsauun Públika.

Maibé, ita labele simu nune'e de'it no sente safisfeito ho rezultadu ne'ebé hetan ona ne'e.

Iha dezafiu barak mak ita atu hasoru iha tempu mai ne'e: atu hadi'a atendimentu, atu halo desizaun sira sai efikás no eficiente, atu prosesa keixa no rekursu sira, atu halo prosedimentu sira sai simplés no labele burokrátiku demais no atu transforma servisu uza surat-tahan ba fali servisu eletróniku no asesivel, hodi utiliza plataforma multimédia nian no teknolojia informasaun no komunikasaun nian foun sira.

*Ita-nia esforsu atu hadi'a, sei la para, no labele para!*

Halo servisu tuir Lei de'it la to'o, bainhira haluha tiha satisfasaun utente sira nian, tanba ida-ne'e hanesan de'it ho haluha tiha razaun fundamentál ne'ebé justifika ninia existénsia atu "*sempre prontu atu serbí Povu*".

Ho lia-fuan badak bele hateten: "*Povu maka bele hatán, karik serbisu ita-nia serbisu ne'e di'ak ka ladi'ak!*"

**Iha Desentralizasaun** – ita lakohi país ida ho velocidade rua, iha ne'ebé kapitál no munisípiu balu de'it maka goza benefísiu husi progresu no desenvolvimentu.

Ita hanesan Governu Koezaun nian ida, iha ne'ebé solidariedade teritoriál, kombate ba diferença, ba izolamentu no eskesimentu maka prevalese. Ita fiar katak desentralizasaun no deskonsentrasaun ne'ebé maka hahú tiha ona ho transférensia atribuisaun, kompeténsia no responsabilidade bele kria órgaun lokál,

munisipál no rejionál sira, sai hanesan oportunidade loloos ida atu harii iha fatin hirak ne'e, Polu Dezenvolvimentu nian hirak ne'ebé loloos.

*País ida de'it, koezu iha progresu, unidu iha Dezenvolvimentu partilladu!*

Ba ida ne'e, ita sei implementa Política Nasionál kona-ba Dezenvolvimentu Lokál ida, ho aprovasaun ba kadru jurídiku ne'ebé presiza atu konkretiza planu dezenvolvimentu munisipál, ne'ebé tenke akompaña loloos husi reforsu no reafetasaun meius, no rekursu umanus ka finanseiru.

Ita hakarak organiza tuir faze eleisaun ba órgaun reprezentativu sira Poder Lokál nian husi tinan 2021 to'o 2023, hodi tau iha konsiderasaun, kondisaun sira ne'ebé maka eziste iha Munisípiu ka Rejiaun ida-idak.

**Iha Administrasaun Eleitoral** – Estudu ida ne'ebé maka pública iha tinan 2017 husi *The Economist*, kona-ba índise demokrasia nian, rekoñese katak Timor-Leste hanesan país ne'ebé demokrátiku liu iha Sudeste Aziátiku, hafoin konsidera prosesu eleitoral, pluralizmu, liberdade no garantia sira, partisipasaun polítika, kultura polítika no funsionamentu instituisaun sira nian.

Faktu ida-ne'e hatudu ona liuhusi solisitasaun ne'ebé halo mai ita ona durante tinan hirak ikus ne'e atu fó apoiu tékniku hodi organiza eleisaun iha país sira seluk hanesan: Giné-Bisau, Repúblika Demokrátika Kongo ka Repúblika Sentru Afrikana.

Maibé, kualidade no kapasidade husi ita-nia administrasaun eleitoral tenke kontinua aseguara no hametin liuhusi formasaun no kualifikasaun ba tékniku eleitoral sira, hodi atualiza resenseamentu no dados eleitoral (*hodi halakon ona husi rejistu, inskrisaun ba sidadaun barak ne'ebé mate ona*) no reve fila-fali no atualiza lejizlasaun eleitoral, hadi'a kapasidade atu hatán ba dezafiu sira.

**Iha Ordenamentu Territóriu** – ita hakarak hadi'a ita-nia kapasidade atu organiza espasu iha ne'ebé populasaun sira hela ba no hala'o sira nia atividade, ho forma ne'ebé sustentavel no kompatibiliza aspetu ekonómiku, sosiál, kulturál no ambientál.

Ita sei haree fila-fali (halo revizaun) ba Lei Baze Ordenamentu Territóriu nian, akompaña ho Kadru Nasionál Planeamentu nian, ne'ebé bele implementa Polu Dezenvolvimentu nian no Zona Espesial Ekonomia Sosiál Merkadu (ZEESM) sira, iha rejiaun oinoin nasaun ne'e nian.

Ba ida-ne'e, ita tenke elabora planu nasional no setorial sira ba ordenamentu, ne'ebé sei konjuga ho planu diretór munisipál sira, no planu urbanu sira ba sidada no zona rural sira, hodi fó asesu ba servisu báziku sira edukasaun, saúde, bee no saneamentu, eletrisidade, merkadu no terminál transporte nian; ne'ebé adekua ba kada fatin.

Sei konjuga mós planu sira ne'e ho Polítika Nasionál kona-ba Mobilidade Urbana, maibé la haluha mós kompromisu ne'ebé halo ona kona-ba illa Ataúru.

Iha Dezenvolvimentu Rurál – ita iha objetivu boot nasaun nian atu halakon moris-kiak no hamlaha, ne'ebé baibain estraga área rurál sira, iha ne'ebé lokaliza fatin hirak ne'ebé izolada, remota no dezfavoresida liu iha nasaun ne'e.

Iha nasaun ki'ik hanesan Timor-Leste, ezisténsia diferensa rejionál no dezigualdade sosiál no ekonómika hanesan inkoerénsia ida ne'ebé reprezenta lakon oportunidade ida ne'ebé boot tebes.

Tanba ne'e, ita sei fó prioridade ba koordinasaun intersetoriál, atu nune'e setór atividade nian ida-idak aborda dezenvolvimentu rurál ho forma transversál.

Ita hakarak kria empregu lokál barak liután, tanba ida ne'e maka forma ida ne'ebé di'ak liu hodi hasa'e nivel moris nian; fó kapasitasaun no formasaun barak liután no kria insentivu ka benefísiu fiskál sira ba inovasaun, empriendedorizmu, autoempregu no kriaun empreza familiár sira ka kooperativa ho dimensaun ki'ik no dimensaun média sira.

Ita mós hakarak hadi'a planeamentu kona-ba atividade agríkola no jestaun kona-ba rai no rekursu naturál sira, ho estudu komparativu husi rejiaun ida-idak, liuliu iha asesu ba infraestrutur ka ba merkadu sira.

**Rejiaun Administrativa Espesiál Oekuse Ambenu (RAEOA)** – kria atu fasilita sinerjia ida ne'ebé di'ak liu, entre instituisaun Estadu nian sira iha rejiaun ne'e, ho hanoin atu permite governasaun ida ne'ebé efikás liu, iha redusaun moris-kiak no atu alkansa moris-di'ak ekonómiku populasaun tomak nian.

**Zona Espesiál Ekonomia Sosiál Merkadu (ZEESM TL)** sira maka programa dezenvolvimentu nasional nian ida, ne'ebé buka atu estabelese zona espesiál komérsiu nian sira ho karakter sosiál, ne'ebé permite kreximentu ekonomia sosiál merkadu nian ida, hodi fó asesu ne'ebé boot liután ba benefísiu, diretu no indiretu, ba ema no populasaun sira iha rejiaun sira ne'e nian.

Haree ba rijidéz husi polítika ne'ebé adota iha Oekusi no inkumprimentu ne'ebé lori tempu naruk tebes ba prosediementu hirak ne'ebé orienta Estadu ne'e, iha ámbitu Administrasaun Públika no governasaun di'ak, ita sei altera kuadru jurídiku atuál rejiaun ne'ebá nian.

Ita sei haketak servisu sira ne'ebé ZEESM TL presta husi funsaun sira autoridade administrativa RAEOA nian nian, atu nune'e bele garante partisipasaun ne'ebé boot liután husi sidadaun no organizaun sosiedade sivíl rejionál sira, iha prosesu dezenvolvimentu nian ne'ebé hala'o iha rejiaun ne'e.

Ba ida ne'e ita sei: integra servisu finansa nian sira iha sistema nasional freebalance; hadi'a sistema kontrolu no fiskalizaun, liuliu kona-ba projetu boot sira ne'ebé sujeita ba fiskalizaun husi Tribunál Kontas nian; hadi'a aprovizionamentu, iha kumprimentu ba rejime sentrá nian; no halo auditoria imediata ida ba RAEOA no ZEESM TL.

**Iha Governasaun Eletrónica** – ita asume iha programa ne'e tomak, ho forma transversál iha setór hotu-hotu, kompromisu lubuk ida kona-ba simplifikasaun, dezburokratizasaun, melloria iha informasaun no divulgasaun kona-ba servisu sira ne'ebé presta, transparénsia no responsabilidade ne'ebé boot liután iha prestasaun konta sira, proximidade no partisipasaun ne'ebé boot liután husi ema sira no organizasaun sira sociedade sivil nian, iha desizaun sira ne'ebé foti no implementasaun husi política dezvoltamentu nian sira.

Atu kumpri kompromisu hirak ne'e hotu, ita aposta iha Governasaun Eletrónica, liuhusi atualizasaun no modernizasaun ba servisu sira ne'ebé iha liuhusi utilizasaun teknolojia foun sira no plataforma komunikasaun nian sira.

Ami hateten tiha ona katak, ligasaun entre servisu públiku sira liuhusi fibra óptika nian ne'ebé instala liuhusi rede tranzmisaun EDTL nian hala'o daudaun hela, ne'ebé sei fó konetividade no internet ba instituisaun Estadu nian hotu-hotu.

Ita sei kria mós kondisaun sira ne'ebé presiza atu nune'e Institutu Teknolojia Informasaun no Komunikasaun nian sira, ne'ebé kria ona foin daudaun ne'e, konkretiza ninia misaun atu jere rede informátika Governu nian.

Ita sei kontinua aposta iha Portál Governu nian sira (ne'ebé inklui *Ministériu ka Servisu sira, ho atensaun liuliu ba Finansas, Transparénsia, Ajuda, Aprovizionamentu no Rezultadu sira*); investe iha plataforma interativa no teknolójika sira; iha formuláriu, servisu no pagamentu online; no iha baze dadus integrada liután ne'ebé iha posibilita ligasaun ka kruzamentu informasaun ba efeitu hodi kombate hasoru fraude no korrupsaun.

**Iha Justisa** – ita sei kontinua ho objetivu boot atu promove Estadu Direitu no atu garante asesu ne'ebé hanesan ba ema hotu ba justisa. Ita hakarak setór judisiáriu ida ne'ebé iha rekursu umanu ne'ebé profisionál, competente, independente no transparente liután.

Konsolidasaun ba servisu Justisa nian sira importante tebtibes atu asegura asisténsia jurídika ba sidadaun hotu-hotu (*liuliu ba sira ne'ebé maka presiza liu, vulnerável liu no presiza liu tulun*) hodi tranzmite konfiansa ne'ebé presiza atu atrai investimentu ne'ebé esensial ba dezvoltamentu ekonomia no pás sosiál.

Ita iha frajilidade estruturál balu ne'ebé ita tenke buka atu korrije no ultrapasa, ne'ebé iha relasaun: ho kuadru legál sira ne'ebé deficiente no la adekuaadu ba realidade; no relaciona ho falta domínio kona-ba modelu ne'e no lian Portugés; frajilidade ne'ebé kondisiona ita-nia objetivu sira ba aplikasaun Justisa ida ne'ebé: asesivel, desentralizada, lais, ekilibrada, konfiavel, independente no justa liután.

Tamba ne'e ami kontinua investe:

- iha dezvoltovientu institusionál – hadi’a di’ak liután kapasitasaun, koordensaun, planeamentu, rekrutamentu (*majistradu no defensor sira*) no formasaun ne’ebé exelente iha SFJ- Sentru Formasaun Jurídika;
- iha konsolidasaun no armonizasaun husi kuadru legál sira – kompleta lakuna sira, hadi’a di’ak liután regulamentu, implementasaun modelu bilinge (portugés no tetun) ba elaborasaun husi aktu normativu sira, hodi kompleta pakote Lei Rai no Propriedade nian, liuliu ho levantamentu Kadastrál no estabelesimentu rezistu prediál.
- iha dezvoltovimentu rekursus umanus nian – ho implementasaun planu estratéjiku kona-ba formasaun kuadros rekursus umanus nian, presiza tau atensaun partikulár liu ba formasaun inisiál, kontínua ka komplementár iha kurtu, médiu no longu prazu, ba (*Ofisiál ka Tékniku sira Justisa nian, Notáriu ka Konservador Sivíl sira, Defensor no Advogadu sira,*) ba formasaun auditor sira Kámara Kontas nian no Juís Supermu Tribunál Administrativu, Fiskál no Konta nian sira;
- iha dotasaun infrastrutura adekuada sira – hodi harii ka hadi’a hikas fali edifisiu sira, liuliu iha: husi PCIC, (sigla, iha lian portugés) – Polisia Kriminál no Investigasaun Sientífika, husi Supremu Tribunál Justisa nian, husi delegasaun Defensoria Pública iha Munisípiu sira; husi rezindénsia guarda prizionál sira; ka Sentru Reabilitasaun Jevenil; ne’ebé maka liga kedas ho rede informátika eletrónika nian;
- iha asesu ba justisa – hakbesik servisu ba sidadaun sira nian, hodi garante neineik maibé beibeik iha munisípiu hotu-hotu, kualidade profesionalizmu, hodi fó atensaun partikulár ba: habelar informasaun kona-ba lei no norma sira, ba notariadu, servisu kadastrál sira, hasai billete identidade no pasaporte eletróniku sira, ka ba seguransa no hadi’a instalasaun prizionál sira nian.
- Iha governasaun di’ak – hadi’a di’ak liután supervizaun, kontrolu, efikásia no efisiénsia husi Konsellu Superiór sira (*karreira profesional no koordensaun setór Justisa nian*), Tribunál Kontas no Orden Advogadu sira; hadi’a orsamentu no jestaun finanseira no meknizmu sira kooperasaun internasionál, ne’ebé kompara ho propriedade no estratéjia sira no objetivu sira nasaun nian.

**Iha Defeza no Seguransa** – presiza forsa armadas no serbisu seguransa sira ne’ebé mak apartidáriu (la tama iha partidu), no obedese ba sira-nia Órgaun Soberania sira iha postura ida, ne’ebé maka bazeia ba Estadu Direitu, tuir diplomasia no buka oinsá atu rezolve no previne konflitu sira, hodi uza forsa bainhira iha rekursu ne’ebé mak ikus liu ona atu hametin pas no estabilidade nasional ka rejional.

Ami hakarak profesional sira, forsa no servisu modernu sira ne’ebé maka transparente, eficiente, kompetente no profesional liután, atubele garante partisipasaun fetu no hatán ba nesiedade sira husi sékulu XXI nian ho amesa oin-oin iha nivel internu no esternu (*husi terrorizmu, tráfico umanu no estupefaiante sira, krime organizadu, kontrabandu, peska ilegal, no seluk-seluk tan*).

Ami kontinua apostu iha modelu ida ne'ebé konsidera importante situaun nasaun nian, hodi dezenvolve kuadru legal ida ne'ebé sólidu no konsistente, koordinadu no intergradu, bele fornese rekursu no meu sira ne'ebé disponivel iha instituisaun oin-oin, konforme define iha konseitu estratégjiku Seguransa no Defeza Nasionál nian.

Ami kontinua investe neineik maibé beibeik iha ekipamentu no infraestrutura nesésáriu sira atu haforsa no hametin setór ida ne'e no hatán ba ami-nia hakarak atu partisipasa iha operasaun hirak ne'ebé envolve forsa no servisu sira, atu hakbiit dezenvolvimentu ekonómiku, sosiál no umanu Nasaun nian.

Ba ida ne'e ami sei treina no hasa'e kapasidade versatilidade, apoiu no resposta sivil sira (iha kazu dezastre natural no emerjénsia sira seluk), hasa'e kontrolu, fiskalizaun no prevensaun husi insidente sira iha águas territoriais ka iha zona ekonómika eskuziva; nune'e mós atun asegura ita-nia partisipasaun iha operasaun umanitária sira no iha manutensaun pás nian, iha neivel bilateral ka multilateral, iha ámbitu Nasoins Unidas nian.

Liuliu **iha Defesa**, ami promove servisu militar (*hanesan devér patriótiku, ezemplár husi sidadania no integridade*); hasa'e kapasidade komponente operasionál terrestre sira no navál nian; haforsa unidade enjeñeria no saúde nian; promove partisipasasun fetu sira nian; hadi'a infraestrutura iha komponente hotu-hotu (*ne'ebé inklui bairru militar sira*); estabelese Akademia ida no planeia Ospital Militar ida; hadi'a sistema komandu, kontrolu, komunikasaun, komputadór no informasaun sira; implemeta polítika ida husi dezenvolvimentu integradu rekursus umanus nian bazeia ba iha méritu; no Sistema Alerta Nasionál, hamutuk ho Sentru Integradu Jestaun Krize sira nian.

Iha **Servisu Nasionál Intelijénsia nian**, ami atribui sei meu sira ne'ebé adekua ba peskiza, rekolla no análise informasaun sira no dados, hodi hakbiit instituisaun ho ekipamentu no meu teknolójiku hirak ne'ebé nesésáriu ba prevensaun no kombate ameasa interna no esterna sira, iha koordinasaun no kooperasaun ho forsa sira seluk no serbisu seguransa nian.

Iha **seguransa**, ami hakarak katak Timor-Leste sai nasaun ida ne'ebé seguru, sai hanesan ezemplu ida direitus umanus nian, iha legalidade demokrátika, iha koordinasaun husi servisu sira ba seguransa interna di'ak ba sidadaun sira.

Ba ida ne'e, ami sei kontinua implementa planu estratégjiku dezenvolvimentu, abrajente (luan) iha modernizasaun nian, kualifikasaun, profisionalizaun no partisipasaun fetu nian, iha forsa no servisu seguransa nian, ne'ebé besik liu ba servisu sidadaun sira nian (iha modelu ida polisiamentu komunitáriu nian) ne'ebé enkoraja prevensaun husi risku no konfliktu sira, ne'ebé promove estabilidade sosiál, kombate kriminalidade, ne'ebé kontrola di'ak liután movimentu sira ketan nian (ba ema no sasan), ne'ebé dezenvolve iha protesaun sivil, kombate sinistralidade rodoviária (kombate asidente sira iha dalan), ne'ebé implementa regulasaun arte marsiál sira, kontinua investe iha kampaña edukasaun ba seguransa, iha formasaun, iha infraestrutura, meu no ekipamentu sira.



Iha Servisu Migrasaun nian, ita hakarak implementa Lei foun kona-ba Migrasaun no Azilu no formuláriu no regulamentu ida-idak ne'ebé presiza ba funsionamentu di'ak sistema jestaun ketan sira nian, ba ligasaun dijital entre postu no servisu sira, ba implementasaun ketan eletrónika sira (e-Gates) no ba melloria infraestruturá no ekipamentu sira.

Iha Protesaun Sivíl, ita hakarak hadi'a resposta ba situasaun emerjénsia sira (polisiál, médika, no bombeiru sira) liuhusi númeru úniku emerjénsia nian no kriasaun mekanizmu alerta nian molok mosu situasaun dezastre naturál sira.

Iha Polísia Sientífika Investigasaun Kriminál (PSIK), ita sei hadi'a asaun prevensaun, detesaun no investigasaun, hodi investe iha laboratóriu no ekipamentu sientífiku no kriminál sira no hametin kooperasaun ho nasaun estranjeiru sira ne'ebé halo servisu hanesan.

**Iha Relasaun Internasionál no Política Esterna**, ita sei kontinua promove kooperasaun bilaterál no multilaterál, hodi haforsa parseria kulturál, ekonómika no komersiál sira ne'ebé fundamentál ba kaptasaun investimentu no ba kapasitasaun instituisaun no rekursu umanu sira.

Tanba ne'e, ita hakarak hametin lasu amizade no kooperasaun ho viziñu sira ne'ebé besik liu, Indonézia no Austrália, liuliu iha implementasaun ba projetu dezentvolvimentu trilaterál, ba oportunidade ekonómika ne'ebé maihusi konektividade, infraestruturá, transporte no ligasaun entre país tolu, ne'ebé ema barak hatene ho naran "*Kreximentu Triángulu*", entre Timor-Leste, Territóriu Norte Ausralianu no Província Indonézia husi Timór Osidental.

Fó mós priviléjiu ba lasu istóriu, kulturál no amizade, ho país membru CPLP nian, ajenda komún ida ho País sira husi G7+; hametin relasaun sira husi nivel hotu-hotu ho País sira ASEAN nian, hanesan parte ba esforsu atu tama hanesan membru ne'ebé ho direitu tomak ba organizaun ida-ne'e; no hametin mós relasaun bilaterál ho nasaun maluk sira no parseiru importante sira, liuliu: Xina, Koreia Súl, Kuba, Estados Unidos Amérika, Japaun, Zelándia Foun, Portugal no seluk tan.

Ita mós hakarak hakle'an ita-nia partisipasaun aleinde iha nivel Internasionál no Rejionál, liuliu ho formalizasaun ba kandidatura ida iha Commonwealth.

**Iha Delimitasaun Ketan-Raik no Ketan-Tasik sira** – La'ós de'it iha nia delimitasaun ba raik no tasik, maibé liuliu iha nia potensial ne'ebé boot liu hanesan sentru dezentvolvimentu Kovalima, Bobonaru no Oekusi, zona sira dame no kooperasaun nian. Ita tenke fiar katak iha ketan husi sorin idak-idak, ita iha familiár no belun ne'ebé ita presiza atu hakat liuhusi Oekusi no Kreximentu Triángulu, hodi aproveita rede komunikaun sira ne'ebé liga ita ba Kupaun iha Timór Osidental ka Darwin iha Territóriu Norte Australianu. La'ós ketan maka fahe ita, maibé liga ita iha ita-nia preparasaun ba integrasaun iha ASEAN ka iha Commonwealth.

Sua Exelénsia, Señor Prezidente Parlamentu Nasionál,

Distintu Deputadu sira,

Ho liafuan badak, itabele dehan katak programa Governu nian ne'ebé ami foin apresenta iha ajenda pontu esensial hitu, atu transforma Timor-Leste ba País ida ne'ebé *Forte, Riku no Seguru*:

- Dahuluk, ita sei promove *sentimentu sidadania no espíritu pertensa nian*, atu hetan moris-di'ak no moris ne'ebé ho qualidade;
- Daruak, ita sei promove *integrasaun no inklusaun* sosial, kultural, edukasionál no ekonómika ba sidadau hotu.
- Datoluk, ita sei kontribui ba *kreximentu ekonomia nian*, hodi aumenta produtividade no kompetitividade traballadór, empresa no país nian;
- Dahaat, ita sei garante *dezenvolvimentu sosial no ekonómiku ne'ebé sustentavel* no sai belun ba ambiente;
- Dalima, ita sei hametin *papél setór privadu nian iha ekonomia* liuhusi iniciativa sira seluk ne'ebé iha setór primáriu (iha agrikultura, pekuária, peskas ka florestas), liga ba reforsu ne'ebé aumenta iha setór sekundáriu (indústria) no tersiáriu (servisu sira);
- Daneen, ita sei asegura *koezaun no ekilibriu territorial*, hodi promove estabelesimentu ba sentru dezenvolvimentu munisipál no rejional.
- Dahituk, ita sei *hamoris diversidade kultural no hadi'a identidade nasional*, hodi promove imajen País nian ne'ebé seguru, modernu no ho qualidade, ba Rejaun no ba Mundu.

Ita bele habadak programa ne'e iha devér no responsabilidade fundamental tolu:

- Dahuluk, implementa política no reforma hirak ne'ebé la'o daudaun, ne'ebé maka komprova katak la'o ho di'ak tebbebes, atu nune'e bele mantein estabilidade no hakbiit dezenvolvimentu ekonómiku no sosial;
- Daruak, promove reforma estruturante atu aselera transformasaun nesesária iha setór hirak ne'ebé la hatán espetativa populasau nian; no
- Datoluk, reforma, korriji no hadi'a prosesu, sistema no metodolojia sira ne'ebé satan netik dezenvolvimentu sustentavel, ho forma transversál, atu isntituisau hotu-hotu bele sai efikáz, responsavel no inkluziva liután.

Sua Exelénsia Señor Prezidente Parlamentu Nasionál,

Distintu Deputadu sira,

Ha'u-nia Governu deklara katak sei kumpri “**kompromisu sira**”, tuir autokrítika no avaliasau dezempeñu, atu hatene, funsiona ka lae: bele ka lae ajuda família sira atu iha moris-di'ak isin no klamar ne'ebé sira prezisa, bele ajuda atu hetan qualidade moris ne'ebé sira hakarak ka lae, iha empregu ne'ebé maka sira buka ka lae, iha oportunidade no kuidadu sira ne'ebé sira iha direitu ba, ka ajuda iha solidariedade ne'ebé prezisa

ba kombatente antigu no sira ne'ebé presiza liu, mukit liu no sira ne'ebé la hetan tulun ka lae liuhusi subsidiu seguransa sosiál nian ida ne'ebé sustentavel.

Ha'u-nia Governu deklara katak sei kumpri “**Mudansa sira**”, tanba bainhira buat ida funksiona di'ak, tenke ba oin nafatin, maibé karik buat ida funksiona la di'ak, tenke hadi'a, forma fila fali ka taka tiha de'it.

Sira hotu ne'ebé simu, goza ka uza osan, bens ka ekipamentu públiku sira tenke responsabiliza, atu nune'e bele iha gastu sira ho kuidadu, atu nune'e bele iha espíritu poupansa, atu nune'e bele iha transparénsia iha gastu sira no atu nune'e bele hadi'a toman aat sira ne'ebé iha tiha ona.

Nune'e de'it maka ita sei bele manán fila-fali ita-nia sidadaun sira-nia konfiansa. Nune'e de'it mak ita bele hatán ba pedidu sira kona-ba aseleraun ne'ebé S. Exa. Prezidente Repúblika temi ona, no setór oin-oin husi ita-nia ekonomia ezije.

Sua Exelénsia, Señor Prezidente Parlamentu Nasionál

Distintu Deputadu sira,

Fó lisensa mai ha'u atu temi tan lia-fuan rua molok hakotu diskursu ida-ne'e:

Ida uluk liu mak agradesimentu ba sira hotu, fetu no mane, ne'ebého laran luak partisipa ona, ho sira-nia kapasidade, abilitasaun, kompeténsia, koñesimentu, maibé liliu ho domin ne'ebé boot tebes, iha elaborasaun Programa ba Governu Konstitusionál VIII nian ida-ne'e.

Ikusliu maka ha'u hakarak agrade se ho haraik an ba konfiansa Timoroan hotu nian, iha territóriu nasionál no iha rai-li'ur. Ita timoroan hamutuk la'ós de'it milaun ida rihun atus rua, tuir estatistika hatudu. Ita barak liután husi ida-ne'e, ne'ebé namkari iha Mundu rai-klaran.

Ha'u sura ho imi-nia partisipasaun, empenamentu, espíritu ekipa nian no espíritu sakrifísiu nian, atubele kumpre hamutuk promesa no kompromisu ne'ebé ita asume ona ba ita-nia Povu Doben!

Ha'u-nia Governu iha atu serbí imi, disponivel atu rona imi nia problema sira no atu rezolve difikuldade sira ne'ebé maka país ne'e hasoru!

Ba Timor-Leste ida ne'ebé: Modernu, Dezenvolidu no Moris-di'ak!

Nai Maromak haraik bensaun mai ita hotu

Obrigada barak ba imi-nia atensaun.